

Muselu Wapama wa Yesu Kirixtu woolebiwa ni Maruku

Madhu oovolowana

Niivuru ndda nilebiwe ni Maruku. Oliye aali muZhudewu a oZheruzalemi. Ahidhowa ni Pawulo vamohi ni Baranabe muulenddoni mweewa mwa olaleyela. Vevale Maruku aali namakamihedha a murumiwi Peduru nluwa na oRoma. Niivuru ndda nalebiwe oRoma wewule muwari mwa yaaka ya 55 ofiyedha 60 Kirixtu agabaliwe.

Madhu a niivuru ndda enowooniha wi Yesu di muthu owiira dhego moo-haanganyedha, mooromela kopolo dhaaye-dhaaye; vano kopolo dhaaye dhinowooneya va masuuzihelo aaye teto vookumiha mineba dhootakala ni waalevelela athu dhoothega dheewa. Oliye mwiinyeene onowiiromola Mwaana a Muthu oyene adhiile wi apeleke egumi yaaye wi aavulumuse athu mwa dhoothega dheewa. Maruku awoga mwaha wa Yesu mooligana ni moohulapiha madhu; asiba vajinji dhowiira dha Yesu okwaranya dhoosuuziha dhaaye.

Niivuru ndda nnowooniha teto wi vang'ono-vang'ono anamasuuzi ale yahambeela wiiwelelamo dha Yesu ni ororomela, mbwenye athu amohi owiinjiva kayarumeedha.

Ogawanyeya wa niivuru

Obathiziwa ni weehiwa wa Yesu *1.1-15*.

Masuuziho ni dhootikiniha oGalileya *1.16 ofiyedha 8.26*.

Olenddo wookuma oGalileya odhowa oZheruzalemi *8.27 ofiyedha 10.52*.

Yesu onowaakona asogoleli a aZhudewu *11.1 ofiyedha 13.37*.

Opiwa wa Yesu ni ovenyihwa mukwani *14.1 ofiyedha 16.8*.

Madhu a verisikulu 16.9-20 yiire weenjehedhiwa, kadhinafwanyeya mwa dhoohadhihela dhoolebiwa dha niivuru ndda na Maruku dhawale.

Zhuwawu Namabathiza onosasanyedha dila ya Yesu Kirixtu
(*Matewuzhi 3.1-12; Luka 3.1-18*)

1 ¹ Wambeela wa Muselu Wapama wa Yesu Kirixtu,^a Mwaana a Mulugu. ² Wona mwalebele namavuhulela Ezaya, eeraga:

*“Miyo ginomuruma osogolo waawo
murumiwi aaga, oyene
onaasasanyedhege dila vasogolo vaawo.”^b*

³ *Ndhu naaye nnokuwa mwiideddereni,
niiraga: ‘Sasanyedhani rampa wi Nabwiya aviremo,
mogoolele dila yaaye’ ”.^c*

⁴ Okumelela wa Zhuwawu Namabathiza mwiideddereni weereyile ndala, owaalaleyela athu eeraga: “Tthwaruwani dhowiira dheenyu, mbathiziwe wi muleveleliwe dhoothege”. ⁵ Athu a mirudda dhaatedhene dha oZhudeya, vamohi ni athu aatene a oZheruzalemi yoodhowa wa Zhuwawu Namabathiza. Aliwa yabweka dhoothege dheewa, Zhuwawu owaabathiza mmwihinjeni Zhordawu. ⁶ Zhuwawu awara guwo dhoosasanyiwa ni mooya a mwaneenyama oneethaniwa kamelo, agamagele sintu na nikupa mmwiinuni mwaaye, aja kwaakwa ni enwi ya mukokolani.^d ⁷ Owaalaleyela athu, eera-ga: “Mundduli mwaaga onoodha mmohiwa oowodha oogikwaranya, naari kagifwaneelele otapula mingoyi dha sapathe dhaaye. ⁸ Miyo ginowuubathizani ni mahinje. Mbwenye oliye onoobathizegeni ni Muneba Woweela”.

Obathiziwa wa Yesu

(*Matewuzhi 3.13 ofiyedha 4.11; Luka 3.21-22; 4.1-13*)

⁹ Va malabo ayene, Yesu akumaga murudda wa oNazarethi, elabo ya oGalileya, ahifiyaga omwihinjeni wa oZhordawu vano ahibathiziwaga ni Zhuwawu Namabathiza. ¹⁰ Mowaaguva Yesu atavuwaga mmahinjeni, ahoonaga odhulu othuleyaga, vano Muneba Woweela ni mooneyelo a kangayiwa wahikitelaga va oliye, ¹¹ odhulu wahiiweyaga ndhu niiraga: “We oli Mwaanaga oodhivela, mwa we ginohagalala”^e

Weehiwa wa Yesu mwiideddereni

(*Matewuzhi 4.1-11; Luka 4.1-13*)

¹² Okuma vevale, mowaaguva Yesu ahithukuleliwaga mwiideddereni ni Muneba wa Mulugu. ¹³ Mwemule Yesu ahikalagamo malabo makumi mannayi eehiwaga ni Sathana. Oliye akala ni aneenyama a mukokolani, angero a Mulugu yoomwiimelela.

^a **1.1** Kirixtu mu ewogelo ya eGerego enatapulela *Muthikitheliwi, Misiya*, naari wi: *oosakuliwa a Mulugu*, oyene onaavulumuse athu. ^b **1.2** Malakiya 3.1 ^c **1.3** Ezaya 40.3 (Bibiliya Seputuwazhinta) ^d **1.6** Namavuhulela Eliyazi ahiwara mowinda. Moone Mamwene a Nabiili 1.8. Dhoowara nda dhinatootnya wi Zhuwawu aali namavuhulela. Moone Zakariya 13.4; Levitiku 11.22. ^e **1.11** Moone Masaalimu 2.7; Ezaya 42.1; Wambeela 22.12

Yesu onowambeela mabasa aaye oGalileya

(Matewuzhi 4.12-14; Luka 4.14-15)

¹⁴Zhuwawu agafugeliwe mukaambura, Yesu ahiwelela oGalileya, alaleyaga Muselu Wapama wa Mulugu, ¹⁵eeraga: “Mudhidhi ohaakwana. Omwene wa Mulugu ohufiya. Mutthwaruwe, murumeedhe Muselu Wapama”.

Wiithaniwa wa anamasuuzo owambeela

(Matewuzhi 4.18-22; Luka 5.1-11)

¹⁶Yesu eeddaga seresere ya Nyaza ya oGalileya, ahawoonaga addibila abiili, Simawu ni Andire, evokedhaga mathavi munyaza, vovi yaali anamatota. ¹⁷Vano Yesu ahawaaddelaga, wiira: “Mudhe mugiharege, guwiireni anamatota a athu”. ¹⁸Mowaaguva aliwa yahaahiyaga mathavi eewa, omuharaga. ¹⁹Egeeddile vang'ono, Yesu ahawoonaga addibila amohi abiili. Tiyago ni ddibile Zhuwawu, ahima a Zebedeyo. Egali mmwanddeyani ni babiiwa esasanyedhaga mathavi eewa. ²⁰Mowaaguva Yesu ahawiithanaga. Aliwa yahimwihiyaga babiiwa Zebedeyo ni anamalaba aaye mmwanddeyani, omuharaga Yesu.

Yesu onowiigara muneba wootakala mwa mulobwana oKafaranawu

(Luka 4.31-37)

²¹Aliwa yahidhowaga oKafaranawu. Vano nigafiyile nlabo na sabuddu, Yesu ahivolowaga mu nyuba ya matugumano,^f wambeela osuuziha. ²²Athu yootikinaga dhosuuziha dhaaye, mwaha oosuuzihaga ni othongi, oohiyanihaga ni masuuzihelo a anamasuuziha a Malamulo.

²³Mu nyuba ya matugumano eyo mwahikumelelaga muthu ahiddiwe ni muneba wootakala. Ahikuwaga ni ndhu nootaama, wiira: ²⁴“Ti! Ninna ddi hiyo ni nyo,^g Yesu muNazarethi? Mudheele onitolosa? Miyo guhununani wi muli Oweela a Mulugu”. ²⁵Mbwenye Yesu ahihiihaga muneba wootakala, wiira: “Wiire pee! Okume mwa muthu ola!” ²⁶Vevale muneba wootakala ole wahimuthikaga vajinjivene ni kopolo muthu ole, vano wahikuwaga mookwaranya, okumamo. ²⁷Athu aatene yaaligi ootikiniheya, yookohanaga, yiiraga: “Dhedhi sowi avi? Dhosuuziha dha musawo dhedhi? Moone! Oliye onolamula ni owodha mineba dhootakala teto dhinomwiiwelela!” ²⁸Bili yaaye yahivuweyaga mowaaguvamwene mirudda dhaatedhene dha oGalileya.

^f **1.21** Nyuba dha matugumano Nda mu ewogelo ya eGerego dheeriwa *sinagoga*. Mabasa eewa kayaali oolobelamoove, naari osuuzamo Malamulo, mbwenye teto yowaathongamo athu yahaaharihamo Malamulo a aZhudewu. ^g **1.24** Mu ewogelo ya eGerego onafuna owoge ddi: *Munihye mmurenddeleni*.

Yesu onomuyiliha mbogohaaye Simawu ni athu amohi
(*Matewuzhi 8.14-17; Luka 4.38-41*)

²⁹Mowaaguva Yesu, Simawu, Andire, Tiyago ni Zhuwawu, yahivenyaga mu nyuba ya matugumano, odhowa vaade va Simawu ni Andire.

³⁰Mudhidhi oyene agavolowile mwemule, yahimwaaddelaga Yesu wi Simawu mbogohaaye oli ookonaanteene muredda, mwaha wa nipaddawe nuulubale. ³¹Yesu ahimwaaddamelaga, omwihiddeela ndada mma ole, omvenyiha, vano nipaddawe omwihiya. Vevale mma ole wambeela waakamihedha aliwa.

³²Ociguwoni, nduwa nidhowaga, athu yowaadhaagana wa Yesu akwiwa aatene aredda ni oohiddiwa mineba dhootakala. ³³Athu a murudda waatene yahitugumanaga vamulago wa nyuba ele. ³⁴Yesu ahaayilihaga ajinji alene yarabula teto ni dhiredda dhoohiyana-hiyana, ahiigara mineba dhootakala dhijinji. Mbwenye minebadha kaahiya wi dhiwogege, mwaha dhahimudidela.

Yesu onoolaleya oGalileya
(*Luka 4.42-44*)

³⁵Bebeheene, ohunasese, Yesu ahivenyaga odhowa omburoni wahavira athu pweepwe. Wewo oolobelaga. ³⁶Simawu ni akwaaye ale yahivenyaga omusayelaga. ³⁷Egamfwanyile yahimwaaddelaga, wiira: “Athu aatene enowuusayelani”. ³⁸Mbwenye oliye ahiiraga: “Kabeni nidhowe mirudda dhimohi dhowaaddamela wewuno, galaleyeto, wewo madhu wovi bi mabasa yadheeliimi”. ³⁹Vano Yesu ahidhowaga weddedda oGalileya waatewene, oolaleyaga mu nyuba dha matugumano teto owiigaraga mineba dhootakala.

Yesu onomuyiliha muthu a mareda
(*Matewuzhi 8.1-4; Luka 5.12-16*)

⁴⁰Muthu mmohi amaredda^h ahidhaaga wa Yesu. Okokora wambeela omuloba-loba, eeraga: “Mwafuna, munowaanda ogeeliha”.ⁱ ⁴¹Yesu ahimweeddiwelaga thagaraga. Ahimutapulelaga ndada omukahinya, wiira: “Ee, gihifuna. Weele!” ⁴²Mowaaguva mareda aaye ale yahinaanelaga, aheelihiwaga. ⁴³Vano Yesu ahimulamulaga wi adhowege, ahimwaaddelaga madhu akopolo. ⁴⁴Ahiiraga: “Ogivuruwane, kumwaaddele muthu mmohi dhedhi. Odhowege, weyooneyihe wa namakutha,^j wavelele mukutho ole walamulele Mozezi. Oyene okale onamoona wa athu aatene wi ohuyilihiwa”.

^h 1.40 *Mareda* mu ewogelo ya eGerego kinaagana maredave mbwenye teto dhiredda dhoohiyana-hiyana dha nikupa na muthu. ⁱ 1.40 *Ogeeliha* Naari wi: *mugiyilihe*.

^j 1.44 Levitiku 14.1-32

⁴⁵Mbwenye muthu ole agavenyile vevale, ahambeelaga olaleya dhaatedhene ni osoriha dhende dhamwiireyele. Mwaha wa dhedho Yesu kaakwanihilege wooneyela voweela mirudda dhaatedhene. Mbwenye oliye akala woolapela okwibi mburo wahaviriwesesa; athu yoodhowaga wa oliye okumela wula ni wula.

Yesu onomuyiliha mulobwana ookwa-yaano

(Matewuzhi 9.1-8; Luka 5.17-26)

2 ¹Vigavirile malabo vang'ono, Yesu ahiwelelaga oKafaranawu, athu yahiiwaga wi oli vaade vaaye. ²Athu ajinji yahitugumanaga mba mule, moofinyana vamulago kavaaligi mburo. Oliye owaalaleyelaga madhu a Mulugu. ³Athu amohi annayi yahimuthukulaga muthu ookwa-yaano, omudhana wa Yesu. ⁴Mbwenye aliwa kayaandaga omvolowana omfiyana vaaligi Yesu mwaha wowinjiva athu. Yahigwelaga vanaantopi, ofugula penyengo epaddi waaligi Yesu, omukitihelavo muliba okwa-yaano ole yamudhigiisuna vanteteni. ⁵Vwoona nrromelo neewa nddo, Yesu ahimwaaddelaga muliba okwa-yaano, wiira: “Mwaanaga, dhoothega dhaawo dhihileleliwa”.

⁶Mbwenye vevale vahikalaga teto anamasuuziha amohi a Malamulo a Mozezi. Aliwa yahambeelaga wiikoha mmurimani mweewa, yiiraga: ⁷“Mwaha bwaddi olaya onawogeliye ndala? Onomunyemula Mulugu. Baani onalevelela dhoothega, ahili Mulugu yeeka baahi?”

⁸Mowaaguva Yesu ahinonaga mmoobuweloni mwaaye wi enowaanganyedha, ahaakohaga, wiira: “Mwaha bwaddi, munoobuwelela dhedhi mmirimani mweenyu? ⁹Yookweya siivi, omwaaddela muliba yaano dhookwa, wiira: ‘Dhoothega dhaawo dhihileleliwa’, naari owoga, wiira: ‘Venya, thukula ntete naawo, weedde?’ ¹⁰Mbwenye wi munone wi Mwaana a Muthu ohukalana kopolo vati vano dhoolevelela dhoothega, moone”. Vevale ahimwaaddelaga ookwa-yaano ole, wiira: ¹¹“Venya, othukule ntete naawo, odhowege vaade vaawo”. ¹²Muthu ole ahivenyaga, othukula ntete naaye ndde okumamo, athu aatene emoonaga. Vano aatene yootikinaga vajinji, wambeela omutamaala Mulugu, ewogaga wi: “Dhowi ndala hiyo kannoonege”.

Yesu onomwiithana Leevi

(Matewuzhi 9.9-13; Luka 5.27-32)

¹³Yesu ahiwelelaga dila emohiwa odhowa seresere ya nyaza. Athu ajinjee-ne yahifiyaga wewo, vano oliye ahambeelaga waasuuziha. ¹⁴Yesu eeddaga wewule, ahimoonaga Leevi,^k mwaana a Alifiyu, agali vamabasani mburo wa musoko. Ahimwaaddelaga, wiira: “Ogihare”. Oliye ahivenyaga, omuharaga.

^k **2.14** Leevi Naari wi: *Matewuzhi*. Moone *Matewuzhi* 9.9.

¹⁵Yesu ajaga vaade va Leevi. Vowi oliye ahikanna oomuhara yaali “anamathega”, vahikalaga anamakoha-musoko^l ajinji ni “anamathega” ajinji yajaga ni Yesu ni anamasuuzi aaye. ¹⁶Vevo anamasuuzi a Mala-mulo a muwari mwa nikuru na aFarizi yahimoonaga wi Yesu onaja ni anamathega teto ni anamakoha-musoko, yahaakohaga anamasuuzi aaye, wiira: “Mwaha bwaddi onaja vamohi ni anamakoha musoko teto ni anamathega?” ¹⁷Yesu ageewile dhedhi ahawaakulaga, wiira: “Athu eli apama kinamurabulela namugu, eehi, mbwenye ale enabulela binamurabulela. Miyo kagadheelee wawiithana athu ooharihamo efunelo ya Mulugu, mbwenye anamathega”.

Yesu onokohiwa mwaha woothuga
(*Matewuzhi 9.14-17; Luka 5.33-39*)

¹⁸Mudhidhi mmohiwa anamasuuzi a Zhuwawu Namabathiza ni aFarizi yahithugaga. Athu yahidhaaga wa Yesu omukoha, wiira: “Mwaha bwaddi anamasuuzi a Zhuwawu ni anamasuuzi a aFarizi enothuga, mbwenye anamasuuzi eenyu kinathuga?” ¹⁹Yesu ahawaakulaga, wiira: “Dhino-waandeya owiithaneliwa mathanga a otela ethugege, namatelaya eganna vevo? ²⁰Mbwenye onoodha ofiye mudhidhi enaavenyihedhiwiiwavo namatela oyo. Mwa mudhidhi oyene finaathugigiwa.

²¹“Muthu kanathukula ecapa ya guwo exa asonela va yoowara yawale. Mwaha wi eera ndo, ecapa exa ele enooweta otala yoowara yawale, otaleya wiwa onakala wuulubale okwaranya wale. ²²Vano teto muthu kanamuhela vinyu muxa mmathumbani a makupa awale. Eera ndo, vinyu oyo onowaatala mathumbaya, ndo vinyu ole onoothathiya, mathumba ayo enomala mabasa. Mbwenye vinyu muxa onaheliwa mathumba maxa”.

Nlabo na sabuddu
(*Matewuzhi 12.1-8; Luka 6.1-5*)

²³Nlabo nimohi na sabuddu Yesu aviraga mmiddani mwa tirigu. Anamasuuzi aaye yahambeelaga okothola mangala a tirigu.^m ²⁴Vevale aFarizi yahimukohaga Yesu, wiira: “Mwaha bwaddi anamasuuzi eenyu eneerana dhokooodhihiwa ni Malamulo va nlabo na sabuddu?”ⁿ ²⁵Oliye, ahiiraga: “Kamweelengile dhaatedhene dhedho dheerile Davidi, oliye ni akwaaye egavoliwe dala? ²⁶Nyo kamunonile ole avolowilege mu nyuba ya Mulugu, ajamo mikaathe dhoreelihiwa va mudhidhi oyene Abiya-

^l 2.15 *Anamakoha-musoko* ala aEzarayeli aatene yawoona wona “anamathega.” Yanna mukalelo wabure vameentoni va athu, mwaha wi yamulabela guveruno a oRoma aali mwiiddani a Ezarayeli. ^m 2.23 Deteronomiyo 23.25 ⁿ 2.24 Malamulo a Mozezi enokooodhihi olaba nlabo na sabuddu. Moone Okuma 20.8-11; Deteronomiyo 5.12-14.

tari agali musogoleli a anamakutha? Mwa dhaatedhene mukaathe nde kadharumeedhiwa ojiwa muthu burebure ehili anamakutha weekiwa.^o Mbwenye teto oliye ahaagawelagamo akwaaye ale yannigiyyena”.^p

²⁷Vano Yesu aheenjedhedhaga wawaaddela, wiira: “Sabuddu opadduseliwe mwaha wa muthu, mbwenye muthu kapadduseliwe mwaha wa sabuddu, naari. ²⁸Miyo, Mwaana a Muthu, di miyo Nabwiya ofiyedha nlabo na sabuddu”.

Yesu onomuyiliha muthu ooragala ndada

(Matewuzhi 12.9-14; Luka 6.6-11)

3 ¹Nlabo nimohi Yesu ahivolowaga mu nyuba ya matugumano. Mwemo mwahikalaga muthu mmohi akwile ndada. ²Athu amohi-wa yoomusugwaga, esayelaga woona akala aamuyilihe muthu nlabo na sabuddu wi ekalena yoomusumelana. ³Yesu ahimulamulaga muthu ole, wiira: “Wiimele, odhe osogolo wuno”. ⁴Ahaakohaga athu ale, wiira: “Ki va nlabo na sabuddu enarumeedheya siivi? Wawiirela athu dhapama, naari wawiirela dhabure? Ovulumusa egumi ya muthu, naari omwihiya akwe?” Athu ayo omaala pee. ⁵Vevale Yesu murima waaye womvoreyaga, vowoona wi yaali athu oohaandeya ndale, ahawang'anaga ni otakaleliwa. Vano ahimulamulaga muthu ole, wiira: “Tapula ndada naawo”. Oliye ahitapulaga, ndada naaye owelelamo okala pama. ⁶Vevale aFarizi ale yahikumaga otugumana emuwogaga mawuje vamohi ni athu a nikuru na Heroddi wi epanganele dila yoompela Yesu.

Wiinjiva wa athu oNyaza ya oGalileya

⁷Yesu vamohi ni anamasuuzaa aaye yahivenyagavo odhowa oNyaza ya oGalileya. Nikuru nuulubale na athu nahimuharaga. ⁸Athu ale yadhiilege oGalileya, amohi a oZhudeya, amohiwa oZheruzalemi, amohiwa a oEddumeya ni ookobela wa oZhordawu teto owaaddamela oTiru ni oSidoni. Aatene yahifiyaga vaaligi oliye, mwaha wi yahiiwaga dhedho oliye dheeriligiye. ⁹Yesu ahawaa-ddelaga anamasuuzaa aaye wi emwaaddamihedhe mwanddeya vakukuuve; woova wi athu enaamfinyege, mwaha yahinjivaga vajinji. ¹⁰Mwa anamwinji ala yahikalagavo aredda ajinji yafunaga omukahinya wi eyile. ¹¹Mineba dhootakala dhamoona, dhootongwelaga vati vakukuuve ni oliye okuwaga, dhiiraga: “Nyo muli Mwaana a Mulugu”. ¹²Mbwenye oliye oosumululaga mwa kopolo wi dhihimvuwihege.

Yesu onowaasakula arumiwi kumi ni abiili

(Matewuzhi 10.1-4; Luka 6.12-16)

¹³Nuwindo, Yesu ahigwelaga omwaangoni, vevo ahawiithanaga athu ayene oliye yaafuniye, aliwa odhowa wewo waaligiye. ¹⁴Ahaasakula-

o 2.26 Levitiku 24.5-9 P 2.26 Samuweli Owambeela 21.1-6

gavo kumi ni abiili “arumiwi”. Ahawaaddelaga, wiira: “Guhuusakulani nyo wi mukalege ni miyo, ginoodha guurumeni wi mwalaleyege, ¹⁵teto guuvaheni kopolo dhowiigarana mineba dhootakala”. ¹⁶Athu kumi ni abiili alene yaasakuliligiye baala: Simawu (oyene Yesu amvahiliye ndina nowi Peduru), ¹⁷Tiyago ni ddbile Zhuwawu, ahima a Zebedeyo (alena yaavahiwe ndina nimohi nowi “Bowaneje”, enatapulela wi “Oonyagula wona dari”), ¹⁸teto Andire ni Filipi, Baritolomeyo, Matewuzhi, Tome, Tiyago (mwaana a Alifiyu), Tadeyu, Simawu (a nikuru na aZeloti)⁹ ¹⁹teto Zhudasi a oEsikariyothi (oyene ampeleke Yesu wa amwiiddani aaye).

Yesu ni Belezebu

(*Matewuzhi 12.22-32; Luka 11.14-23; 12.10*)

²⁰Nuwindo, Yesu ahidhowaga vaade vaaye, vano athu ajinji yahitugumanaga, vevale oliye ni anamasuuzi aaye kayannaga mudhidhi wooja yego. ²¹Anaamudhi aaye egeewile dhedhi, yahidhaaga wi emuthukule, mwaha yoobuwelaga wi winna aneba.

²²Anamasuuziha amohi a Malamulo, yahidhaaga okumela oZheruzalemi, yoowogaga, yiiraga: “Muthu ola ohiddiwe ni Belezebu”. Yeeraga teto: “Kopolo dhinegariiyena mineba dhootakala dhinakumela wa Belezebu, mpogo a mineba ndo”. ²³Vano Yesu ahawiihanaga athu wi edhe vakukuuve, oowogaga misibe, eeraga: “Ki Sathana onaande addi wiyiigara yeekaaye? ²⁴Athu a muumweneni mmohive yambeela wiinyuwelana, omweneya kunaliba. ²⁵Vano athu a emudhi emohive yambeela ogawanyeya, emudhiya yowindo kinaliba. ²⁶Vano akala a muumweneni wa Sathana enowiinyuwelana amohive egawanyeya, Sathana oyo kanaalibe, enatapulela wi omweneya ohumala baahi.

²⁷“Kalivo onavolowa mba mwa muthu akopolo wi amwaake dhoo-kalana dhaaye ahaabihile ommaga, eera ndo athukula dha mbamwa.

²⁸“Ebaribareene ginowaaddelani wi athu enoleveleliwa dhoothega dheewa dhaatedhene teto ni dhoowoga dhoomunyemula Mulugu. ²⁹Mbwenye ole onanyemula Muneba Woweela, kanaleveleliwa. Yoothega yaaye enakala ya okala ni okala”. ³⁰Yesu ahiwogaga dhedhi vovi athu ale yoowogaga, yiiraga: “Ohiddiwe ni muneba wootakala”.

Amaaye ni addibile Yesu

(*Matewuzhi 12.46-50; Luka 8.19-21*)

³¹Amaaye ni addibile Yesu yahidhaaga vaade vale. Wiimela ode, waaruma athu wi yamwiithane. ³²Athu ajinji yakaraatilege vati omwaapelela. Aliwa yahimwaaddelaga, wiira: “Amaayo ni addibilo eli vaadeva, enowuufunani”.

⁹ 3.18 *AZeloti* Aliwa yaali a nikuru na aZhudewu yeethukulela oPalestina wona anamurala. Aliwa yoofuna wiinyuwela mwa pwere wi yaagonjihe ni wawiiigara aRoma.

³³Mbwenye oliye ahiiraga: “Amma ni addibilaga baani?” ³⁴Vevale ahaasugwaga athu ale yamwaapeelege, eeraga: “Amma ni addibilaga baalena eli veva. ³⁵Aate-ne eneerana ofuna wa Mulugu, ayene biili addibilaga, arogoraga ni amma”.

Musibe wa namadhala
(*Matewuzhi 13.1-9; Luka 8.4-8*)

4 ¹Yesu ahiwelelaga osuuziha dila emohi seresere ya Nyaza ya oGalileya. Anamwinji yahitugumanaga wewo momwaapelele oliye, yahitthabwaga wiinjiva, mwaha wa ela oliye ahivolowaga mmwanddeyani okaraati. Mwanddeya ole waaligi mwinko waaddamela seresere ya nyaza waaligi athu aatene. ²Yesu owaasuuzihaga dhego dhijinji mwa misibe. Vowaasuuziha owiiraga: ³“Mwiiwesese! Namadhala ahidhowaga odhala bewu. ⁴Adhalaga, bewu dhimohi dhamorelege moogomela dila, vano balame dhahidhaaga oddoddavo oja. ⁵Bewu dhimohi dhahimorelaga vamabweni, vahaali theya ejinji. Dhahimelaga mowaaguva, mwaha theyaya kayaddihile. ⁶Vano nduwa nigwelaga, dhahinyaala wumma, mwaha misisidha kadhatibeleye. ⁷Bewu dhimohi dhamorelege vamiingani. Vano dhunnuwaga dhoovaha dha bewu nde dhahihogeya, nuwindo bewudha kadhahavahile pama. ⁸Vano bewu dhimohi dhahimorelaga theya yapama. Dhahimelaga pama, wunnuwa, vano dhahivaha. Dhoovaha dhimohi dhahikanna mangala makumi maraaru, dhimohi makumi matanu ni nimohi (60), dhimohi zana (100)”. ⁹Vano Yesu ahiiraga: “Ole winna obaruni wowiwa, eewe!”

Yesu onowoga mwa misibe
(*Matewuzhi 13.10-17; Luka 8.9-10*)

¹⁰Nuwindo, Yesu agalivo yeeka ni anamasuuzaa aaye kumi ni abiili ale, vamohi ni amohiwa yakaliyena, yahimukohaga dha musibe ola. ¹¹Oliye ahawaakulaga, wiira: “Nyoovo, Mulugu ahuuvahani otapulela dhowiipiteya dha Omwene waaye. Mbwenye wa amohiwa eli ode wa Omwene, dhaatedhene eneewela mmisibeni, ¹²vowi, madhu a Mulugu enowoga, yiiraga:

“*Woono enowoona,
mbwenye kinoona yego;
wiiwa enowiiwa,
mbwenye kineeweelamo yego,
wi ehitthwaruwe,
mwa ela Mulugu kanaalevelele*”.

Otapulela wa musibe wa namadhala
(*Matewuzhi 13.18-23; Luka 8.11-15*)

¹³Nuwindo, Yesu ahaakohaga, wiira: “Nyo kamuneeweelamo musibe ola? Ki muneeweelamo addi misibe dhimohi? ¹⁴Namadhala di ole ona-

r 4.12 Ezaya 6.9-10

dhala madhu a Mulugu. ¹⁵Bewu nde dhamorelege mundila dhinatapulela athu ale enawiiwa madhu a Mulugu, mbwenye mudhidhi oyene Sathana onodha, wawaakamo madhu yadhaliwe mmirimani mweewa. ¹⁶Bewu dhadhaliwege vatheyani ya mabwe dhinatapulela athu ale enawiiwa madhu a Mulugu, mudhidhi oyene wawaakela ni ohagalala. ¹⁷Vano vowi madhu ayo kayanna misisidha dhoddiha, athu ayo enalibihedha mudhidhi vang'ono baahi. Mowindo yafwanyiswa masooso naari oharahariwa mwaha wa madhu ale, mudhidhi oyene athuya enowelega munduli. ¹⁸Bewu dhadhaliwege vamiingani nde dhinatapulela athu ale enawiiwa madhu a Mulugu, ¹⁹mbwenye vosanyeyela ni dha vati vano, odhiveliwa dhoorela ni okalela murogo dhego dhimohi, dhavolowamo enohogeya madhu ale. Mowindo kadhinahawene furuuta. ²⁰Mbwenye bewu dhadhaliwege vatheyani yapama dhinatapulela athu ale enawiiwa madhu a Mulugu, yawaakela pama. Athu ala enovaha furuuta, amohi makumi maraaru, amohi makumi matanu ni nimohi (60), amohi zana (100)".

Musibe wa panti

(Luka 8.16-18)

²¹Yesu ahiwelelaga, waakoha, wiira: "Kalivo onahiddiha panti akuneela ni mpika, naari ohela vati va kama, eehi. Kinahela mburo wowooneyela? ²²Vevale kayiivo yoologoheya ehinaadhe yooneyele, naari yowiipiteya ehinaadhe yooneye voweela. ²³Oyene winna mabaruru owiiwana, ewe!"

²⁴Ahawaaddelaga, wiira: "Mwaakamelege madhu ayene muna-wiiwiinyu. Mpimo oyene munaapimiinyuna akwiinyu, Mulugu onodha oopimeleni oyene vovuuthongani. Ebaribareene wa nyoovo onoodha Mulugu ookwaranyihedheni. ²⁵Ale yinna, enoodha yaakele dhimohi dhijinjji, mbwenye ole ohinna yego, naari eyene yinniiyena enoodha emwaake".

Musibe wa bewu dhedho dhinamela ni wunnuwa

²⁶Yesu aheenjedhedhaga wawaaddelaga aliwa musibe mmohi, wiira: "Omwene wa Mulugu oli wona muthu onadhala bewu mmiddani. ²⁷Naari oliye aagonaga mahiyu, bebehni aavenyaga, mudhidhi waatene, bewu dhadhaliliye nde dhinomela wunnuwaga, mbwenye mwiinya kanonona wi dhinapadduwa havi. ²⁸Vowi theya enovahiha dhilo weekiwa. Enambeela omela, nuwindo njere, osogolowa mangala teto mangala ale enowiithwa. ²⁹Vano mangala ale yeethwa, muthu ole onothukula mbene woogwaddana, wafiya mudhidhi woohadda".

Musibe wa kogolo ya bewu ya mpeza

(Matewuzhi 13.31-32,34; Luka 13.18-19)

³⁰Mooharela Yesu ahiiraga: "Omwene wa Mulugu onaligana ni ddi? Nifwanafwanihe ni musibe baani? ³¹Onaligana ni kogolo ya mpeza, ena-

kala eng'onong'ono yadhaliwa vatheyani, mwaliganiha ni kogolo dhimohi vati vano. ³²Mbwenye adhala, enomela, bewuya wunnuwa okwaranya bewu dhimohi dha mukwani, dhinokalana mijindda dhuulubale, balame dhinowaanda omagamo dhitunji mmurintini mwiwa”.

³³Yesu aasuuzihaga athu ni misibe dhijinji dhooligana ni nda teto aasuuzihaga mwa mukalelo wa athu ayo waandiisu wiiwelelamo.

³⁴Kaasuuziha vihili misibe. Mbwenye akala yeeka ni anamasuuzi aaye, owaatapulela dhaatedhene.

Yesu onomaaliha nipevo nuulubale
(*Matewuzhi 8.23-27; Luka 8.22-25*)

³⁵Nlabo nenddo, nduwa nigadhowile, Yesu ahawaaddelaga anamasuuzi aaye, wiira: “Kabeni nilabuwele kobela emohi ya nyaza”. ³⁶Vano aliwa yahaahiyaga anamwinji ale, ogwela mmwanddeyani mwaaligi Yesu. Vahikalaga teto mwanddeya dhimohi dhaaharaga. ³⁷Nuwindo, nahitatamuwaga nipevo nuulubale. Kuluzi yoovolowaga mmwanddeyani, mmwanddeyanimo mwahambeelaga odhaala mahinje. ³⁸Mbwenye mudhidhi oyene Yesu aaligi mundduli mmwanddeyani, agonaga agasameele yoosameela. Vevale anamasuuzi ale yahimvenyihaga, wiira: “Namasuuziha, kamunapwatha yowi hiyo nnooddadda?” ³⁹Yesu ahivenyaga, omaaliha nipevo ndde, olamula nyaza, wiira: “Maala! Okale murenddele!” Nipevo ndde nahimaalaga, nuwindo okala murenddele mulubale. ⁴⁰Vevale Yesu ahaakohaga, wiira: “Mwaha bwaddi munooviinyu vajinji? Nyooovo kamwinna nrromelo?” ⁴¹Mbwenye aliwa yowoovagave vajinji, yookohanaga mmohi ni mukwaaye, yiiraga: “Olaya muthu baani, onafiyedha wiiweleliwa nipevo ni nyazeene?”

Yesu onomuyiliha muthu oohiddiwa ni muneba wootakala
(*Matewuzhi 8.28-34; Luka 8.26-39*)

5 ¹Yesu ni anamasuuzi aaye yahifiyaga okobela ya Nyaza ya oGali-leya, elabo ya oZherasa. ²Yesu akitagawene mmwanddeyani, ahithamageliwaga muthu mmohi ahiddiwe ni muneba wootakala akalesa omasiye. ³Muthu ole akalesa munsiyeni,^s vano kalivo aakwaniha ommaga, naari ni fingwi. ⁴Athu yooxixa dila dhijinjidhene ommaga meddo ni kurenti teto yommaga mada ni fingwi, mbwenye oliye oopadha fingwidha, kurentina nommagana meddo noopadheya. Kalivo aakwanihile omugonjiha. ⁵Mutana ni mahiyu akalesa omasiye wewo ni mmwaangoni, okuwaga eevoreyaga ni mabwe.

⁶Vevale oliye ahimoonaga Yesu woolapelawene, ahimuthamagelaga, okokora vameentoni vaaye. ⁷Okuwa ni ndhu nootaama, wiira:

^s 5.3 Masiye a mudhidhi olene yakala wona nikungu.

“Munafuna ddi ni miyo, Yesu, Mwaana a Mulugu Akopolo Ookwaranya Dhaatedhene? Mu ndina na Mulugu ginowuulobani, kamugoonihe goyi”.⁸ Oliye awogelaga ndo vowi Yesu ahiwogaga dhowi: “Muneba wootakala we, kuma mwa muthu ola!”⁹ Vano Yesu ahimukohaga, wiira: “Ndina naawo oli aani?” Oliye ahaakulaga, wiira: “Ndina naaga gili ‘Anamwinji’^t mwaha nili ajinjeene”.¹⁰ Vano oliye ahimuloba-lobaga Yesu vajinji wi mineba ndo ahiigarele ode wa murudda ole.

¹¹ Waaddamela vamwaangoni vevale, voojaga nikwedda nuulubale na kumba. ¹² Vano mineba dhootakala nde dhahimulobaga Yesu, wiira: “Muniigarele mukumbani mule, nirumeedhiheni wi navolowe mwemule”.¹³ Yesu ahirumeedhihaga. Mineba dhootakala nde dhahikumaga ovolowa mukumbani. Vevale nikwedda naatenene nahimaruwaga okitela muddibani dhithamagaga, wiivokedha munyaza, ofiyedha okwela mmahinjani mwemo. Dhaatedhene dhaaligi macikwi meenddi.

¹⁴ Amakambuzi a kumba yahithawaga, odhowa olaleyaga muluwani ni mmiruddani. Vevale athu yahidhaaga wi yoone dhedho dheereyilege. ¹⁵ Egafiyile wewo waaligi Yesu, yamoonilege muthu ahiddiwe ni anamwinji a mineba dhootakala ole agakaraatile vati, agawarile, aneba ale egamalile. Athu ale yahikalagana woova. ¹⁶ Amakambuzi a kumba ale yonelege dhowiireya dhaatedhene nde, yahawaaddelaga dhedho dhamwiireyelege muthu ahiddiwe ni mineba dhootakala nde teto ni kumba nde. ¹⁷ Athu ayo yahimulobaga ni ntidi Yesu wi avenyewo omuruddani wiwa.

¹⁸ Nuwindo, Yesu ahigwelaga mmwanddeyani, muthu ole ahiddiwe ni mineba dhootakala, ahimulobaga ni ntidi wi adhowe ni oliye. ¹⁹ Mbwenye Yesu ahikooddaga, omwaaddela, wiira: “Odhowege owaninyu wawaaddele dhego dhuulubale dhedho Nabwiya dhuwiireliye mwa thagaraga dhaaye”. ²⁰ Muthu ole ahidhowaga, wambeela olaleya omuruddani oneeriwa oDekapolisi, dhedho Yesu dhamwiireligiye. A oDekapolisi, egeewile dhoopadduwa nde, athu aatene yahitikinaga vajinji.

Yesu onomuyiliha mwaana a Zhayiro ni mma mmohi

(*Matewuzhi 9.18-26; Luka 8.40-56*)

²¹ Yesu ahilabuwaga odhowa kobela ya nyaza. Agafiyile okobela, anamwinji yahitugumanaga seresere ya nyaza vevo vaaligi oliye. ²² Vano ahifiyaga muthu mmohi, ndina naaye Zhayiro, oyene aali mmohi mwa apogo a nyuba ya matugumano. Agamoonile Yesu, ahikoragaga

^t 5.9 *Anamwinji* Mu ewogelo ya eGerego ndhu nddi nneeriwa *Lezhiyawu*. Enatapulela wi nikuru na anyakoddo macikwi matanu ni nimohi. Aaneba ole ahiromolaga ndina nenddi otapulela wi mineba dhootakala dhedho dhaali mwa oliye dhaali dhijinji wona nikuru nuulubale na anyakoddo.

omanyaloni waaye, ²³wambeela omuloba ni ntidi, eeraga: “Kamwiirena, mwaanaga a mwaana-mwihiyana ohalile vang'ono okwa. Akala dhinowaandeya, mwamuhele mada wi ayile, akalena egumi”. ²⁴Yesu ahimaruwaga odhowaga ni oliye. Anamwinji yoothaanana ni oliye yeeddaga moopinyaminyana.

²⁵Vano vahikalaga mwihiyana mmohi oyene abulelena oreda wa omweerini yaaka kumi ni biili. ²⁶Ahikalana goyi vajinji, anamugu ajinji yooxixa omuyiliha. Ahithathila dhoorela dhaaye dhaatedhene, mbwenye kaayila. Ebaribareene mareddaya yoothabwa. ²⁷Mwihiyana ole ageewile dha Yesu, ahivolowaga otaganyihedheya ni anamwinji ale, ofiya odduli wa Yesu, okahinya yoowara yaaye. ²⁸Mmurimani mwaaye oobuwelaga wi: “Gakahinyave yoowara yaaye, ginoyila”. ²⁹Nuwindo, mowaaguva maredda ale oomweerini yahimalaga, mwiinya ahoonaga mmwiilini mwaaye wi maredda aaye ehimala.

³⁰Mudhidhi olene Yesu ahoonaga wi kopolo dhimohi dhihikumamo mwa oliye. Ahirugunuwaga wawaang'ana athu ale, waakoha, wiira: “Okahinyile yoowara yaaga baani?”

³¹Anamasuuzi aaye, yahiraga: “Nyo munowoona wi athu enowuupinyaminyani, vano munakoha addi wi: ‘Ogikahinyile baani?’ ”

³²Mbwenye Yesu owawaang'anaga wi amoone oyene wiirilena dhedhi. ³³Vevale mwihiyana ole owoovaga wambeela ogurumela, mwaha wi ahuubuwelelaga dhedho dhamwiireyelege. Ahidhaaga waaddamela vaaligi Yesu, okokora vameentoni vaaye, omwaaddelihamo dhaatedhene wona mweereyeliwa. ³⁴Yesu ahimwaaddelaga, wiira: “Mwaanaga, nrromelo naawo nuhuuyiliha. Dhowa ni murenddele, maredda aawo ehimala”.

³⁵Yesu awogagave, yahifiyaga athu okumela vaade va Zhayiro, musogoleli a nyuba ya matugumano. Yahimwaaddelaga oliye, wiira: “Ii, mwaaninyu ohumariheya. Kammukukumulege Namasuuziha”.

³⁶Mbwenye Yesu ahiiwaga dhedho dhawogilege athu ale. Ahimwaaddelaga Zhayiro, wiira: “Kawoove, ororomele baahi”.

³⁷Yesu kaarumeedhilege wi emuhare athu amohi, mbwenye Peduru, Tiyago ni Zhuwawu, ddibila a Tiyago, ayene baahi. ³⁸Aliwa vafiyiligiisu vaade va Zhayiro, mpogo ole a nyuba ya matugumano, Yesu aha-woonaga anamwinji, yakathamiheyilege yiinddaga moolibiha, amohi ehihimedhaga. ³⁹Oliye agavolowile, ahaakohaga, wiira: “Mwaha bwaddi okathamiheyeliinyu, mukuwaga, muhihimedhaga? Mwaana ola kakwile, onoogona”. ⁴⁰Athu ale yahambeelaga omuteya moonemula.

Oliye ahaakumihedhaga vaade aatene, omuthukula babe ni amaaye a mwaana ole, ni ayene yaaligi ni oliye, ovolowa osuubini waaligi mwaana ole. ⁴¹Vevale ahimwihiddaga mwaana ole ndada, wiira: “*Talita, kume!*”, enatapulela wi: “Mwaana-mwihiyana we, kavenya!” ⁴²Mwaana-mwihiyana ole ahivenyaga, wambeela weedda, vovi aali a yaaka kumi ni biili.

Athu ale yahitikinaga vajinji. ⁴³Yesu ahaalamulaga wi ehivuwihe muse-lu wa oyilihiwa wula oli waatewene. Nuwindo, ahaarumaga wi emvahe yooja mwaana-mwihiyana ole.

Yesu onokooddiwa oNazarethi

(Matewuzhi 13.53-58; Luka 4.16-30)

6 ¹Yesu vavenyiligiye vevale, ahiwelelaga owaniwa, anamasuza aaye yahimuharaga oNazarethi, oluwani waaye. ²Oliye wambeela osuuziha mu nyuba ya matugumano nlabo na sabuddu. Athu ajinji yegi otikina egeewile dhoosuuziha nde, yookohanaga mmohi ni mukwaaye, yiiraga: “Olaya osuuzile waani dhego dhaatedhene nda? Tthottho dha musawo baani ovahiwe oliye? Oneerana addi dhootikiniha nda? ³Ola kahuwo namasema? Maaye kahuwo Mariya? Addibile kahuwo Tiyago, Zhuuze, Zhuda ni Simawu? Anamwali eli ni hiyo kahuwo teto arogoriye?” Aliwa yahimwiidda.

⁴Yesu, ahawiirelaga: “Namavuhulela onoriihiwa dhipaddi dhaatedhene, ohiya nluwa naaye ni amudhi aaye naari a vaade vaaye”. ⁵Mowindala kaandile wiirana matikiniho oNazarethi, ohuli waayiliha athu amohi vowaatadeelela madada. ⁶Vano Yesu ahitikinaga ni mwaha wa ohukalana nrromelo weewa. Yesu aheddedda mirudda dhowaaddamela asuuzihaga nlogo.

Mabasa a anamasuza kumi ni abiili

(Matewuzhi 10.1,5-15; Luka 9.1-6)

⁷Oliye ahawiithanaga anamasuza aaye kumi ni abiili, waaruma abiili-abiili; waavaha kopolo dhowiigarana mineba dhootakala. ⁸Oliye ahaalagaga wi ehithukule yego ya voolenddoni, ohuli mukogodho baahi; ehithukule mukaathe, naari thumba na voolenddoni, naari korowa musintuni mweewa, ⁹eware satho, ehithukule maleya meenddi. ¹⁰Ahawiirelaga: “Vaade munaafiyedhiinyu mukalege vevo, ofiyedha mudhidhi onavenyiinyu mmuruddani mule. ¹¹Nyoovo mwafiya mmuruddani mwahaakeliwa pama teto yahiiwelela madhu eenyu, mvenyewo wewo, mutate nthubi na mmanyaloni mweenyu. Ela enaakale etoonyihedho ya mwaha wokooddiwa”.

¹²Vevale aliwa yahimaruwaga, wambeela olaleya wi aatene etthwaruwe mwa dhoothega dheewa. ¹³Yowiigara mineba dhootakala dhijinji, yowaakuthulela makura aredda ajinji, yaayilihaga.

Okwa wa Zhuwawu Namabathiza

(Matewuzhi 14.1-12)

¹⁴Mwene Heroddi owiwa dhedho dhawogiwa, dhowi ndina na Yesu nihinoneya dhipaddi dhaatedhene. Athu amohi yowiraga: “Zhuwawu

Namabathiza divenyile muukwani mwahaya buuyene oliye okaleliiyena kopolo dhowirana matikiniho”.

¹⁵Amohi yeeraga: “Oliye di Eliyazi”.

Amohiwa yeeraga: “Oliye di namavuhulela wona namavuhulela awale”.

¹⁶Heroddi ageewile athu dhawogiiwa, ahuubuwelelaga dhamwiireliye Zhuwawu, wiira: “Zhuwawu ole gilamuleliimi opadhiwa muru waaye, ohuvenya muukwani!”

¹⁷Vowi Heroddi dalamule wi Zhuwawu amagiwe, afugeliwe mu-kaambura, mwaha wa Heroddiya amuteliliiye, agali mwadha ddibile Filipi. ¹⁸Vowi Zhuwawu kaamaala owoga, eeraga: “Kadhinarumeedhihiwa omutela mwadha ddibilo”. ¹⁹Heroddiya oomuharahara Zhuwawu mwaha wa dhego dhedho vano oomusayeleda mukalelo wi ampe. Mbwenye kaafwanya, vovi ²⁰Heroddi oomoova Zhuwawu, oomwaakihedha, ahinonaga wi oliye aali owogoowa ni oweela murima. Vano Heroddi oodhiveliwa vajinji wawiiwa madhu ala naari emulatagave murima.

²¹Vano nahifiyaga nlabo Heroddiya nooniligiye totela yowaakwana wi amurabulihe Zhuwawu, naaligi nlabo najiwaga mathanga, oothabela obaliwa wa Heroddi. Yaaligi vevale anamalaga aaye, asogoleli a anyakoddo ni athu oofuneyesesa a oGalileya. ²²Mwaana a Heroddiya agavolowile vabwaloni vajiwaga mathanga ahiinaga, Heroddi ni owiithaniwa aatene yahidhiveliwaga vajinji. Vevale mwene ahiiraga: “Ogilobe yego enafuniwe, gineere guuvahe”. ²³Ahimuroromelihaga, wiira: “Miyo gineere wuvaha enafuniwe, naari okale wuugawela omwene waaga vaari ni vaari, ginowuvaha”.

²⁴Namwali ole ahikumelaga vaade, odhowa waakoha amaaye, wiira: “Miyo ginaalobe ddi?”

Heroddiya ahimwaakulaga, wiira: “Olobe muru wa Zhuwawu Namabathiza”.

²⁵Mowaaguva, namwali ole ahiwelelaga vameentoni va mwene, ahilobaga, wiira: “Ginafuna mugivahe muru wa Zhuwawu Namabathiza muhele mmuziwoni mu, dhiinoveva”.

²⁶Mwene ahikubanyaga vajinji mbwenye kaarunihilege yooloba ya namwali ole mwaha wa nrromeliho neeriligiyyena teto mwaha wa anameethaniwa yaaligi vevale. ²⁷Nuwindo, mwa mudhidhi olene mwene ahimulamulaga munyakoddo^u mmohi wi amudheelena muru wa Zhuwawu. Oliye ahidhowaga okaambura, ompadha muru, ²⁸oliye ahiiragana dharumiwigiiye, odhana muruya mmuziwoni, omvaha namwali ole, oliye wawinka amaaye. ²⁹Anamasuuzi a Zhuwawu egeewile dhedho dheereyilege, yahidhowaga othukula mwiiliya odhowa ologoha munsiyeni.^v

^u 6.27 EGerego: *namapa*. ^v 6.29 Masiye a mudhidhi olene yakala wona nikungu.

Yesu onowiinjiviha mikaathe ni somba

(*Matewuzhi 14.13-21; Luka 9.10-17; Zhuwawu 6.1-15*)

³⁰Arumiwi yahiwelagawo wuulenddoni wa mabasa eewa, otugumana ni Yesu, yahimwaaddelaga dhaatedhene dheeriligiwa ni osuuziha.

³¹Vahikalaga athu ajinji, yoodhaaga amohi edhowaga ofiyedha wi Yesu ni arumiwi aaye ehikanne mudhidhi wooja. Yesu ahawiirelaga: “Mudhe ni miyo. Ndowneni weekiihu nafwanye mburo wofwaasa wi navume vang’ono”.

³²Aliwa yahivenyaga weekiwa ni mwanddeya, odhowaga mburo wofwaasa. ³³Athu ajinji yahawoonaga emaruwaga, vano yahaadidelaga wi baaliwene. Athu aatene a mmiruddani yahithamagelaga wewule, okala araaji ofiya, aliwa yahinafiye.

³⁴Yesu akitaga mmwanddeyani mule, ahawoonaga anamwinji, aha-weeddiwelaga thagaraga vajiinji, vovi yaaligi wona mabila oohukanna owaajiha. Vevale ahambeelaga waasuuziha dhego dhijinji. ³⁵Wambeelaga oriba anamasuuzi a Yesu yahimwaaddamelaga omwaaddela, wiira: “Mburo ola mwiiddeddereni, ndala onooriba; ³⁶Mwaarume anamwinji ala edhowege wi aliwa yafiye mookala mwiwa, mmuruddani mowaaddamela yagule dhootakuna”.

³⁷Yesu ahawiirelaga: “Nyooovo mwaavahe dhego dhootakuna”.

Mbwenye aliwa yahimwiirelaga: “Ebaribari munafuna nagule dhootakuna wi anamwinji aatene ala etakune, ndo dhinaguliwe korowa dha parata mazana meendi (200)!”^w

³⁸Vevale Yesu ahaakohaga, wiira: “Nyooovo mwinna mikaathe mingaasi? Dhowani moone”.

Vooniligiwa, aliwa yahiwelagawo, wiira: “Hiyo ninna mikaathe mitanu ni somba biili”.

³⁹Yesu ageewile dhedho, ahaarumaga anamasuuzi aaye wi yawiirele anamwinji ale ekaraati nikuru-nikuru vathongweni. ⁴⁰Aatene yahika-raatigi nikuru na athu zana (100) ni nikuru na makumi matanu (50). ⁴¹Nuwindo, Yesu ahithukulaga mikaathe mitanu ni somba biili, osugwa odhulu, omutamaala Mulugu mwa yooja ele. Vooharela opadhula mikaathe nde waavaha anamasuuzi aaye wi yaagawele athu ale. Oliye ahiiragana emohive ni somba nde. ⁴²Aatene yahijaga orubala. ⁴³Omago-mihedhowa anamasuuzi yahidhaalihaga middanga kumi ni miinddi ni dhoochala dha mikaathe ni dha somba. ⁴⁴Athu yajilege mikaathe yaaligi vakukuuve macikwi matanu (5.000). ⁴⁵Nuwindo, mowaaguva Yesu ahawiirelaga anamasuuzi aaye wi egwele mmwanddeyani esogolege,

^w 6.37 Naari wi: *denariyo*. Denariyo yaali korowa yawale ya parata ya oRoma mutheengo waliveliwa namalaba alaba nlabo nimohi.

edhowe nluwa na Betisayida, kobela emohi ya nyaza. Mowindo oliye ahihalaga wi aapaganye anamwinji ale.

Yesu onowedda vadhulu va mahinje a munyaza
(*Matewuzhi 14.22-27; Zhuwawu 6.16-24*)

⁴⁶Agamalile waapaganya aliwa, Yesu ahigwelaga omwaangoni wi alobele. ⁴⁷Oribaga, mwanddeya waaligi vaari va nyaza, vano Yesu ahalilege vamuruddani vale yeeka. ⁴⁸Yesu ahinonaga wi aliwa yahikanna makathamihho a ocapa mwanddeya, mwaha wi pevo yahitthabwaga. Omaselo, Yesu ahidhowaga waaligi aliwa eeddaga vadhulu va mahinje munyaza. Akalagahi onowaakwaranya. ⁴⁹Vamooniligiisu wi onedda vadhulu va mahinje, aliwa yoobuwelaga wi muzimu, yookuwaga. ⁵⁰Aatene yeeraga ogurumela vamooniligiisu. Mbwenye mowaaguva Yesu ahiwogaga ni aliwa, wiira: “Mulibe mirima, di miyo, kamoove!” ⁵¹Nuwindo, Yesu ahigwelaga mmwanddeyani ni aliwa, vano pevo yahimaalaga. Yootikinaga vajinji. ⁵²Aliwa kayeewelegemo yootikiniha yowiinjiwihiwa wa mikaathe. Yahummihaga mirima dheewa.

Yesu agali murudda wa oGenezaretu

⁵³Vano egalabuwile nyaza, yahifiyaga murudda wa oGenezaretu, omagelela mwanddeya weewa. ⁵⁴Mowindo egakitile mmwanddeyani, mulogo wahimudidelaga Yesu. ⁵⁵Ndala, athu a murudda waatene olene yegi othamaga, yowaathukulaga aredda vamateteni yaadhowagana waaligi Yesu. ⁵⁶Vano Yesu aafunaga odhowa mmiruddani, naari mmaluwani, naari mburo dhimohi, athu yowaathukulaga aredda wadhaagana vathaddo, yoolobaga ni ntidi wi yaahiye vang'ono aredda ekahinye mmagomelo mwa yoowara yaaye. Aatene alene yamukahinyaga oliye, yooyilaga.

Yesu onosumulula magano a makolo a aZhudewu
(*Matewuzhi 15.1-20*)

7 ¹AFarizi^x ni anamasuuziha amohi a malamulo, yadhiilege oZheruzalemi, yahitugumanaga vaaligi Yesu, ²yahoonaga wi anamasuuzi aaye amohi yajaga ni madada “ootakaleene” wona mwa magano eewa, ela sowi yajaga ehaabihile ohaba mmadani. ³(Vowi aFarizi ni aZhudewu amohiwa aatene kinaja ehihabile mmadani eharihagamo magano a makolo eewa. ⁴Yawela omusika ni mburo dhimohi, aliwa kinaja yego ehihabile mmadani. Teto dhihikalawo dhilemeelelo dhimohi aliwa dhinaharihiwa wona nda ohuwa kopo, mulinga, dhibale dha mugogo,^y

^x 7.1 *AFarizi* Aliwa yaali a nikuru na anamalobela aZhudewu ala yeera wi yahara Nipangano Nawale ni malamulo mamohi ni dhilemeelelo dha aZhudewu mooharihamo.

^y 7.4 Naari wi: *mukuwa*.

ni olilidhene^z dhakaraateliisu yaajaga.)⁵ Anamasuuziha a malamulo ni aFarizi yahimukohaga Yesu, wiira:

“Mwaha bwaddi anamasuuzi aawo enaja ni madada ‘ootakaleene’, kinaharihamo magano a makolo eewa?”⁶ Mbwenye Yesu ahawaakulaga, wiira: “Ezaya awoga ebaribari vavuwihiliye mutheenga wa Mulugu mwaha wa nyo anamanyengetha, valebiliye, eeraga:

“*Nlogo ndda nnageebedha ni milomo,
mbwenye mirima dheewa dhili woolapela ni miyo.*

⁷ *Nnageebedha ebeweene,
vowi masuuziho enasuuzihiisu eli malamulo
oosasanyiwa ni athu, ehili oosasanyiwa ni miyo’.*^a

⁸ Munaahiya malamulo a Mulugu okwibi, weeddelaga dhilemeelelo dha athu”.

⁹ Aheenjedhedhagave, wiira: “Nyo muli ooxaga wi mwihye malamulo a Mulugu mwahela masuuziho eenyu-eenyu. ¹⁰ Mooliganiha, Mozezi wiire: ‘Waariihege ababo ni amaayo’^b vano teto: ‘Ole onaaruwana ababe naari amaaye athongiwe avahiwe goyi ya opiwa’.^c ¹¹ Mbwenye nyo muneera: ‘Muthu awaaddela ababe naari amaaye eera, dhaatedhene dhoofwanelela olabiha wi dhuukamihedheni dhili Korubani’, (ela sowi mvahi wa Nabwiya), ¹² vano munowiivenyihavo wiiragana yego si yego wi mmukamihedhena babiinyu naari mmeenyu. ¹³ Mukalelo ola munohiya malamulo a Mulugu ni dhilemeelelo dhedho dhinalaleyiinyu. Vowi munowiirana dhedhi teto munowiirana dhego dhijinji dhowinda”.

¹⁴ Yesu ahawiithanaga olendo mmohiwa anamwinji wi emwaaddamele, wiira: “Mvuruwane mwaatene dhinafuniimi owoga, vano mwiiwelelemo: ¹⁵ Kavili dhego ode wa muthu dhavolowa mwa oliye dhinamutakaliha. Mbwenye dhinakuma mwa muthu sinamutakaliha”.^d

¹⁷ Yesu agaahiyile anamwinji ahidhowaga vaade, anamasuuzi aaye yahimukohaga yootapulela ya musibe ole.^e ¹⁸ Oliye ahawaakulaga, wiira: “Nyooovo kamuneeweelamo? Kamunonile wi kilivo yego ode wa muthu eni yavolowa mwa oliye, yaandaga omutakaliha, ¹⁹ vovi kinaya mmurimani, mbwenye enaya munifuni, yeera ndo okumela ode wa mwiili?” (Voolaleya nda, oliye avuwihaga wi dhooja dhaatedhene kahi dhootakala, athu ejege.)

²⁰ Nuwindo, aheenjedhedhaga, wiira: “Dhinakuma mmurimani mwa muthu sinamutakaliha, ²¹ vovi fu muwari mwa mirima dha athu muna-

^z 7.4 Naari wi: *kuluxawu dthing'onong'ono dhookaraatela yaajaga.* ^a 7.7 Ezaya 29.13

^b 7.10 “*Waariihege...amaayo*” Moone Okuma 20.12; Deteronomiyo 5.16. ^c 7.10 “*Onaaruwana...opiwa*” Moone Okuma 21.17; Levitiku 20.9. ^d 7.15 Enofwanyeya verisikulu 16 eneera: *Ole onaanda wiiwa, eewe elebiwe mu dhoolebiwa ni madada dhimohi dhixa.*

Mbwenye anamasuuzi ajinji enoobuwela wi madhu ala kiyalebiwe ni Maruku. ^e 7.17 *Musibe* dhoweelenga dhinasoriha dha moobuwelelo a mukalelo woofwanafwaniha, dhedho dhinasuuziha gano; dhoofwanafwaniha naari dhooharana vaari va dhego biili.

kuma dhowuubuwelela dhabure, makalelo a ooraruwa, wiiya ni opa, ²²vowi fu muwari mwa murima teto munakuma dhooraruwa, wiimana, dhabure, onyengetha, dhootaduwa, nrima, waaba, wiithukulela, olodhowa. ²³Dhabure dhaatedhene dhedhi dhinakuma muwari mwa murima, nda sinamutakaliha muthu”.

Nroromelo na mwihiyana a oSiru-oFinisiya

(Matewuzhi 15.21-28)

²⁴Yesu ahimaruwaga vevale odhowaga waaddamela nluwa na oTiru. Nuwindo, agafiyile, ahivolowaga mba, vowi kaafunilege wi athu enone wi oliye oli wewule, mbwenye kaandile wiipita. ²⁵Ahikalawo wewule mwihiyana mmohi anna mwaanaye a mwihiyana anna muneba wootakala. Mudhidhi olene ageewile owogiwa dha Yesu, ahidhowaga vaaligi Yesu, okokora vamanyaloni vaaye. ²⁶Mwihiyana ola aali oode, awoga eGerego aali a nlogo nneethaniwa a oSiru-oFinisiya, oomuloba-loba wi eegaremo muneba wootakala mwa mwaanaye ole a mwihiyana. ²⁷Oliye ahimwiirelaga: “Vowambeela waahiye ahima yaabihe oja, kadhinakala pama okumiha dhooja dha ahima waavokedhaga anaanabwa”.

²⁸Nuwindo, mwihiyana ahimwaakulaga, wiira: “Ee, Nabwiya, mbwenye anaanabwa eli vati va meeza enaja dhoonyenyeya dhinamoriha ahima”.

²⁹Yesu ahimwiirelaga: “Mwaha wa madhu egaakuliliwe, odhowe vaade vaawo ni murenddele, vowi muneba wootakala ohuvenyamo mwa mwaanawo a mwihiyana”. ³⁰Vano agawelege vaade, mwihiyana amfwanyilege mwaanaye a mwihiyana agakonaantile vakamani, vowi muneba wootakala wahikumaga mwa oliye.

Yesu onomuyiliha muthu oohiwa ni ooguguma

³¹Vooharela Yesu ahimaruwaga waaddamela nluwa na oTiru, ovira nluwa na oSidoni teto ovira Nyaza ya oGalileya, odhowa elabo ya oDe-kapolisi. ³²Agafiyile wewule, athu amohiwa yahimudheelagana muthu aali oohiwa ni oohuwoga pama, ooguguma, yahimulobaga wi amutapulele madada. ³³Yesu ahimvenyihagavo vaari va anamwinji, omudhowana vovihivale, omukahinya mmabaruni ni dhimbuno, vooharela okahinya nluwa na mulobwana ole ni mare. ³⁴Nuwindo, ahisugwaga odhulu, ovikumela vajinji, vano wiira: “Efata!”, enatapulela wi: “Ofuguwe!” ³⁵Vano mowaaguva obaruni wa mulobwana ole wahifuguwaga, nluwa naaye nahitapuwaga, oliye wambeela owogaga pama.

³⁶Yesu ahaakooddihaga ale yaaligivo wi ehawaaddele athu amohiwa, naari aakooddihileve aliwa, yootthabwaga olaleya. ³⁷Nlogo naatenene nahikalagana otikina wuulubale, aatene yowiiiraga: “Oliye onowiiirana pama dhaatedhene! Onowiiirana ofiyedha aliba ohiwa wiiwaga teto aliba ohuwoga owogaga!”

Yesu onowiinjiviha mikaathe ni somba olenddo wa nabiili
(*Matewuzhi 15.29-39*)

8 ¹Malabo alene, anamwinji yahitugumanaga dila emohiwa, kayannaga yego yooja. Nuwindo, Yesu ahawiithanaga anamasuza aaye, wiira:

²“Ginowaweeddiwela thagaraga athu ala; wovi enowaakwaniha mala-bo maraaru egali ni miyo, ehinna yego yooja”. ³Gaaruma wi edhowege ehijile, enohileya mundila, wovi amohiwa ekumile woolapa. ⁴Anamasuza aaye yahimukohaga, wiira: “Nnafwanye wuvi veeddeddereniva, yooja yowaakwa anamwinji ala?” ⁵Yesu ahaakohaga, wiira: “Mwinna mikaathe mingaasi?” Aliwa yahimwaakulaga, wiira: “Ninna mikaathe mitanu namiinddi”. ⁶Ahaalumulaga wi anamwinji ekaraati vati. Yesu othukula mikaathe nde mitanu namiinddi, omutamaalela Mulugu, ogwaddanya wawinka anamasuza aaye wi yaagawele anamwinji. ⁷Teto yahikannaga somba vang'ono, Yesu ahimutamaalelaga Mulugu mwaha wa somba nde, vano wawinka anamasuza aaye wi yaagawele anamwinji. ⁸Omagomelowa, yahiddoddelaga dhoonyenyeyadha, odhaalaha middanga mitanu namiinddi. ⁹(Yaaligivo athu macikwi mannayi (4.000).) Ahaapaganyaga aliwa. ¹⁰Dhigeereye nda, mowaaguva Yesu ahigwelaga mmwanddeyani ni anamasuza aaye, odhowaga elabo ya oDalamanuta.

AFarizi enoloba etoonyihedho
(*Matewuzhi 16.1-4*)

¹¹AFarizi yahifiyaga vevale wambeela omuwaga muwano Yesu. Aliwa yoomweehaga emulobaga wi awoonihe etoonyihedho yootikiniha yookumela odhulu. ¹²Mbwenye Yesu ahivekumelaga vajinji, wiira: “Mwaha bwaddi anamabaliwelamo ala enaloba etoonyihedho emohi? Ebaribareene ginowuwaaddelani wi kamunavahiwa etoonyihedho emohi”. ¹³Vevale ahaahiyaga, owelela omwanddeyani omaruwa odhowaga okobela wa nyaza.

Pole-pole ni emela ya asogoleli a zHudewu
(*Matewuzhi 16.5-12*)

¹⁴Anamasuza yahiddiwaalaga othukula mikaathe, yannaga mikaathe mmohi baahi mmwanddeyani. ¹⁵Yesu ahaawaraalihaga, wiira: “Pole-pole, mwiyiing'anele ni emela^f ya aFarizi ni ya Heroddi”. ¹⁶Aliwa yahambeelaga owoga mmohi ni mukwaaye, yiiraga: “Oliye onawoga nda mwaha wowi kaninna mukaathe”. ¹⁷Yesu ahinonaga dhapadduwaga ni aliwa wawiirela: “Mwaha bwaddi munavaanyihaniinyu, bohu-

^f 8.15 *Emela* yaali etoonyihedho yalabihiwana ni ovaha mukalelo wabure.

kalawo mukaathe? Nivano kamuneeweelamoove? Sowi miru dheenyu sowummave? ¹⁸Nyo muhukalana meento mbwenye kamunoona; muhukalana mabaru mbwenye kamuneewa! Muhuddiwaala ¹⁹vagwaddiliimi mikaathe mitanu wa athu macikwi matanu (5.000), mwadhaalihile middanga mingaasi dhoochaladha?” Aliwa yahaakulaga, wiira: “Middanga kumi ni miinndi”. ²⁰“Vagwaddiliimi mikaathe mitanu namiinndi wa athu macikwi mannayi (4.000), mwadhaalihilege middanga mingaasi dhoochaladha?” Aliwa yahimwaakulaga, wiira: “Middanga mitanu namiinndi”. ²¹Yesu, wiira: “Nyoovo kamuneeweelamoove?”

Yesu onomuyiliha muthu oohoona a oBetsayida

²²Dhigeereye ndo aliwa yahifiyaga oBetsayida, wewo athu yahimudheelagana muthu oohoona, yahimulobaga ni ntidi wi amukahinye muthu oohoona ole. ²³Yesu ahimwihiddeelaga ndada muthu oohoona ole omukogodhihela okwibi wa mudhi. Nuwindo, omutapera mare mmeentoni vano omuhela madada, ahimukohaga, wiira: “Ehikala enooniwe?” ²⁴Mulobwana ole omusugwa, omwaakula wiira: “Ee, ginowawoona athu ale enaligana wona mithanko yeeddaga”. ²⁵Yesu ahimuhelaga madada dila emohiwa omeentoni waaye. Oliye ofugula dila bili meento, wona waaye owelelamo, vano woonaga pama dhaatedhene. ²⁶Nuwindo, Yesu ahimurumaga odhowa vaade, wiira: “Ohuhabuwe mudhi ole”.

Wiisorihwa wa Peduru

(*Matewuzhi 16.13-20; Luka 9.18-21*)

²⁷Mowindo Yesu ni anamasuuzwa aaye yahidhowaga mirudda dhaali waaddamela maluwa a oSezareya oFilipi. Mundila, Yesu ahaakohaga anamasuuzwa aaye, wiira: “Athu enagiira gili aani?” ²⁸Aliwa yahimwaakulaga, wiira: “Amohi enowiirani muli Zhuwawu Namabathiza, amohi enowiirani muli Eliyazi teto amohiwa enowiirani muli namavuhulela”.

²⁹Yesu ahaakohaga, wiira: “Ki nyoovo, muneera gili aani?” Vano Peduru ahimwaakulaga, wiira: “Nyo muli Kirixtu, ole aroromelihiwe”.^g ³⁰Vevale Yesu ageewile nda, ahaahiihaga wi ehimwaaddele muthu dhedho Peduru dhawogiliye.

Yesu onovuwiha olenddo wowambeela okwa waaye ni ovenyihwa waaye

(*Matewuzhi 16.21-28; Luka 9.22-27*)

³¹Nuwindo, Yesu ahambeelaga waasuuziwa anamasuuzwa aaye, eeraga: “Eli yoofuneya wi Mwaana a Muthu^h arabulihwe vajinji, ofiyedha gikooddiwe ni

^g 8.29 *Kirixtu* mu ewogelo ya eGerego enatapulela *Muthikitheliwi, Misiya*, naari wi: *oosaku-liwa a Mulugu*, oyene onaavulumuse athu. ^h 8.31 Yesu di Mwaana a Mulugu, mbwenye ndina *Mwaana a Muthu* enooniwa wi Yesu teto aali muthu. Muniivuru na Daniyeli 7.13-14 ndda nili ndina nneethaniwana Misiya (*Kirixtu*).

asogoleli, apogo a anamakutha ni anamasuuziha a malamulo, gipiwe, vano vavira malabo maraaru givenyihiwe”.³² Yesu awogaga dhedhi mowiiweya wa aliwa. Mbwenye Peduru ahimwiithanelaga vovihivale wambeela omusumulula.³³ Vano Yesu ahirugunuwaga, waasugwaga anamasuuzi aaye, omusumulula Peduru, wiira: “Okwaranyevo viliimi va, Sathana! We kunapwatha mwa dhego dha Mulugu, mbwenye mwa dhego dha athu”.

³⁴Nuwindo, Yesu ahawiithanaga anamwinji ni anamasuuzi aaye, waaddelela, wiira: “Onafuna odha wa miyo, eekoodde oliyeene, akapathe muraddi waaye, agiharege”.³⁵ Ole onafuna ovulumusa egumi yaaye, oneere oyeleela, mbwenye ole onayeleele egumi yaaye mwaha wa miyo ni mwaha wa Muselu Wapama,ⁱ oneere ovulumusiwa.³⁶ Muthu onafwanyedhamo ddi voofuna opura elabo yaatene ya vati vano, ayeleela egumi yaaye?³⁷ Muthu onalivele ddi wi oobole egumi yaaye?³⁸ Akalavo muthu mwa nlogo nddi ooholowa ni oothega akalelaga manyazo dhego dhina-suuzihiimi, miyo, Mwaana a Muthu, teto ginoodha gimukalele manyazo oliye vinaadhigiimi mu nthithimihoni na Ababa ni angero oweela.

9 ¹Vano Yesu ahawaaddelaga, wiira: “Ebaribareene ginowuadde-lani wi amohi mwa nyoovo muli veva kamunakwa muhoonile Omwene wa Mulugu, odhaaga ni owodha”.

Ohiyaniheya wa Yesu

(*Matewuzhi 17.1-13; Luka 9.28-36*)

²Egavirile malabo matanu ni nimohi Yesu ahimuthukulaga Peduru, Tiyago ni Zhuwawu, waadhowana vadhulu va mwaango wootaama, okalawo weekiwa. Vevale Yesu ahihiyaniheyaga vameentoni veewa.³ Dhoozara dhaaye dhahisadduwaga okala dhoweela mbuu, ozherimelaga. Kalivo namafula a mwiilaboni aande weeliha wovi ndala.⁴ Yahikumelaga vameentoni vaaye Eliyazi vamohi ni Mozezi, ala yoowogaga ni Yesu.⁵ Vevale Peduru ahiwogaga ni Yesu, wiira: “Namasuuziha, eli pama nikale wewuno. Nimage misasa miraaru: mmohi weenyu, mmohi wa Mozezi, mmohi wa Eliyazi”.⁶ (Peduru kaanonilege yawogigiye, vovi aatene yahidhaaleliwaga woova.)⁷ Vooharela wahi-dhaaga murabo waakuneela aatene, vano mwemo mwahikumaga ndhu, niiraga: “Ola di mwaana aaga oodhivela. Mmwiiwelele!”⁸ Mowaaguvava, egasugwile wu ni wu, kayamoonilege muthu mmohiwa, ahili Yesu.⁹ Nuwindo, ekitaga omwaangoni, Yesu ahawaaddelaga wi ehimwaaddele muthu dhego dhooniliwa, ofiyedha Mwaana a Muthu avenyihwe muukwani.¹⁰ Aliwa yoologolelave mmirimani nde dheereyilege,

ⁱ **8.35** *Muselu Wapama* onaagiwana dhoolaleya dhedho Mulugu dhifuguliiyena dila odheela mwa Kirixtu wi athu ekale ooleveleliwa dhoothega dheewa ekalege ni Mulugu. Athu enarumeedha ebaribari ela, Mulugu onowaarumeedha.

mbwenye yookohanaga vakaleligiwa araaru enatapulela ddi “ovenyihwa muukwani”.

¹¹Aliwa yahimukohaga, wiira: “Mwaha bwaddi anamasuuziha a malamulo enawogeliisu wi Eliyazi dinaakale muraaji odha?”^j ¹²Vano Yesu ahawaakulaga, wiira: “Ebaribareene Eliyazi dinaakale muraaji odha wi awelihedhe dhego dhaatedhene. Vowi dhihilebiwa Mwaana a Muthu enofuneya arabule vajiinji teto anyemuliwe. ¹³Miyo ginowuwaaddelani wi Eliyazi ohudha, vano athu yahimwiirela dhaatedhene dhafuniwa wona mulebeliwiwa dha oliye”.

Yesu onomuyiliha muzombwe oohiddiwa ni muneba wootakala
(*Matewuzhi 17.14-23; Luka 9.37-45*)

¹⁴Egafiyile waaddamela mburo waaligi anamasuuziwa amohi, yaha-woonaga anamwinji egawaapeele. Teto yahawoonaga anamasuuziwa a malamulo evaanyihanaga ni aliwa. ¹⁵Vevale anamwinji ale egamoonile Yesu, yahirurumuwaga, omuthamagela omulojela. ¹⁶Vevale oliye ahaakohaga, wiira: “Nyo munavaanyihelana ddi?” ¹⁷Mulobwana mmohi aaligi vaari va anamwinji ale ahaakulaga, wiira: “Namasuuziwa, gihimudhana mwaanaga wa nyo, oliye ohiddiwe ni muneba wootakala ohunamwihya wi awogege. ¹⁸Muneba wootakala ola wamwihidda, onomutongwihedha vati, okumaga nipweru muwano mwaaye, waatakunaga meeno, mwiili waaye onowumma. Gahaaloba anamasuuziwa eenyu wi yiigare muneba wootakala ole, mbwenye aliwa kayaandile”. ¹⁹Yesu ahaakulaga, wiira: “Athu ooyeva nrromelo! Ofiyedha alini ginaakaliimi ni nyoovo? Ofiyedha alini givilelaga ni nyoovo? Mmudhena wuno muzombweya”. ²⁰Aliwa yahimudhowagana. Muneba wootakala ogamoonile Yesu, wahimuthikaga muzombwe ole ni owali, omutongwihedha vati opigiriyaga, okumaga nipweru muwano mwaaye. ²¹Yesu ahimukohaga baabi a muzombwe ole, wiira: “Omalile mudhidhi mingaasi agali ndala?” Oliye ahaakulaga, wiira: “Wambeela wiihimani”. ²²“Moolenddo majinjeene woomutongwihedha veeko, woomutongwihedha mmahinjeni wi ompe. Akala nabwiya dhinowaandeya omuyiliha, needdiweleni thagaraga, munikamihedhe”. ²³Yesu ahawiiirelaga: “Nyoovo muneerela ddi akala nabwiya munowaanda? Dhaatedhene dhinowaandeya wa ale enaroromela”. ²⁴Vano mowaaguva baabi a muzombwe ahikuwaga, eeraga: “Miyo ginororomela! Gikamihedheni wi gigonjihe ohuroromela waaga!” ²⁵Yesu agoonile wi anamwinji yootugumanaga vaaligiye, ahihihaga muneba wootakala ole, wiira: “Miyo ginowuulamula, we muneba wohiiwiha, woohuwogiha, ovenyemo mwa muzombwe ola, kuwelele ovolowa mwa oliye!” ²⁶Vano muneba wootakala ole, okuwaga, wahimuthikaga muzombwe ole ni

^j 9.11 Enawoga dha odha wa Muthikitheliwi.

owali okuma mwa oliye, omwihya akalagahi wiire okwa. Athu ajinji yeeraga: “Muzombwe ole ohukwa”.²⁷ Mbwenye Yesu ahimwihiddeelaga ndada omukamihedha ovenya muzombwe ole, wiimela. ²⁸ Nuwindo, Yesu agafiyile vaade, anamasuuzza aaye yahimukohaga ombale, wiira: “Mwaha bwaddi hiyo yahaandelihu wiigara muneba wootakala ole?” ²⁹ Vano Yesu ahawaakulaga, wiira: “Mukalelo wa muneba ole oneegariwa ni malobelo baahi”.^k

Yesu onovuwaha dila biili dha okwa waaye ni ovenyihwa waaye
(*Matewuzhi 17.22-23; Luka 9.43b-45*)

³⁰ Yesu ni anamasuuzza aaye yahimaruwaga vevale, aviraga epaddi ya oGalileyi. Yesu afunilege wi ahikalevo aanone aliwa waaligiisu, ³¹ vovi aasuuzihaga anamasuuzza aaye, owawaaddela, wiira: “Ohaaddamela mudhidhi wi Mwaana a Muthu apelekiwe mmadani mwa athu. Aliwa eneere ompa, mbwenye oneere ovenyihwa, yavira malabo maraaruru”.^l
³² Anamasuuzza aaye kayeweelamo dhawogesa Yesu, mbwenye yowoovaga omukoha.

Mpogo baani?
(*Matewuzhi 18.1-5; Luka 9.46-48*)

³³ Nuwindo, yahifiyaga nluwa ning'onong'ono na oKafaranawu. Egali vaade, Yesu ahaakohaga, wiira: “Mwavaanyihana ddi mundila?” ³⁴ Aliwa kayaakulilege yego, vovi voolenddoni viwa yawogaga yowi baani aakale mpogo.^m ³⁵ Agakaraatile, oliye ahawiithanaga kumi ni abiili ale, wiira: “Akalavo onafuna okala muraaji, onakala oogomihedha, vano aalabege aatene”. ³⁶ Vevale ahimuthukulaga mwaana mmohi omuhela vaari veewa. Vooharela, ahimukubaarelaga, wiira: ³⁷ “Ole onamwaakela mwaana mu ndina naaga, onagaakela miyeene. Ole onagaakela miyo, kanagaakela miyeeneve, mbwenye ole ogirumile”.

Ohunavaanyihana ni hiyo, oli mwa hiyo

³⁸ Zhuwawu ahimwiirelaga:

“Namasuuziha, nihimoona mulobwana mmohi eegaraga mineba dhoo-takala mwa ndina neenyu, mbwenye nihimwihiiha mwaha wi kaali nikuru neehu”. ³⁹ Mbwenye Yesu ahawaaddelaga, wiira: “Kammwihii-hege, vovi kalivo oneerana yootikiniha mwa ndina naaga, vooharela

^k **9.29** Enofwanyeya madhu owi: *Mukalelo wa muneba ola oneegariwa ni malobelo vamohi ni othuga* elebiwe mu dhoolebiwa ni madada dhimohi dhixa. Mbwenye anamasuuzza ajinji enoobuwela wi *vamohi ni othuga* madhu ala kiyalebiwe ni Maruku. ^l **9.31** Ozeya 6.2
^m **9.34** *Mpogo* kinaagana wunnuwa wa muthu, mbwenye enaagana dha osogolela mabasa, nlogo, naari elabo.

awogaga obure wa miyo. ⁴⁰Ole ahinavaanyihana ni hiyo, oli vamohi ni hiyo. ⁴¹Ebaribareene ginowuwaaddelani wi olene onoovahani ekopo ya mahinje mu ndina naaga, mwaha wa nyooovo okala a Kirixtu,ⁿ ola kadhawe ayeleela yoothuviwa yaaye.

Yesu onowawaaddela woopiha wa dhoothega

⁴²“Onaamuthegihe mmohi wa ana-ahima ala yinna nrromelo wa miyo, yaali yapama wi muthu ola amageleliwe mukohi nibwe nuulubale na nsilo, avokedhiwe munyaza. ⁴³Akala ndada naawo ninowuuthegiha, ogwaddewo, soofuneyesesa ovolowa mwiigumini yoohumala ni ndada nimohi ohiya okalana madada mameenddeene, vano odhowe omunddoni woohuthima. ⁴⁴[Mwemo miingu dhihinakwiiwa, munddoya kunathima.] ⁴⁵Akala nnyalo naawo ninowuuthegiha, ogwaddewo, soofuneyesesa ovolowa mwiigumini yoohumala ni nnyalo nimohi, ohiya ovokedhiwa omunddoni woohuthima ni manyalo mameenddeene. ⁴⁶[Mwemo miingu dhihinakwiiwa, munddoya kunathima.] ⁴⁷Akala niinto naawo nimohi ninowuuthegiha, ovenyihemo, soofuneyesesa ovolowa muuMweneni wa Mulugu ni niinto nimohi baahi, ohiya okalana meento mameenddeene, ovokedhiwena omunddoni woohuthima. ⁴⁸Mwemo miingu kadhinakwa, vano munddoya kunathima.

⁴⁹“Aatene enoweleeleliwa ni munddo wona mwiinyu. ⁵⁰Mwiinyu bwapama, mbwenye wakumuwa, onaweleelele avi odhiva? Egumi yeenyu ekalegehi eheliwe mwiinyu, vano mukalegena murenddele mmohi ni mukwaaye”.

Yesu onowoga dha omwalana

(*Matewuzhi 19.1-12*)

10 ¹Yesu ahimaruwaga oKafaranawu, odhowaga murudda wa oZhudeya, olabuwela kobela emohi ya mwihinje Zhordawu. Anamwinji yahitugumanaga omwapeelela, oliye wambeela waasuuziha wona moolemelelela.

²AFarizi amohiwa yahifiyaga vevale omukoha, wiira: “Malamulo enorumeedhiha wi muthu amwalanenge ni mwihiyanaaye?” Voomukoha ndo yafunaga emweeche emfwanyena mwaha.

³Mbwenye Yesu ahawaakulaga, wiira: “Mozezi oolamuleleni ddi?”

⁴Aliwa yahaakulaga, wiira: “Mozezi ahirumeedha wi muthu amulebelege mwihiyanaaye kaarata yoomwalana, eera ndo amwiigare”.^o

⁵Yesu ahawaakulaga, wiira: “Mozezi oolebeleni nlamulo ndda mwaha wa ovaadda mirima dheenyu. ⁶Mwaha wowi vowambeela Mulugu va-

ⁿ 9.41 Kirixtu mu ewogelo ya eGerego enatapulela *Muthikitheliwi, Misiya*, naari wi: *oosaku-liwa a Mulugu*, oyene onaavulumuse athu ^o 10.4 Deteronomiyo 24.1

paddusiliye dhego dhaatedhene, ahaapaddusa athu abiili, mulobwana ni mwihiyana.^p 7Mwahaya buuyene mulobwana oneerege omwihiya babe ni amaaye, ataganyihedhane ni mwihiyanaaye, ⁸abiili ala enakala mwiili mmohive. ⁹Vowi kinakala athu abiili, enakala mwiili mmohive. ⁹Mowindo ele Mulugu egumanihiliye, muthu kamwalanihe”.

¹⁰Egafiyile vaade, anamasuza yahimukohaga Yesu dha madhu ale. ¹¹Oliye ahawaaddelaga, wiira: “Oyene onamwalana ni mwihiyanaaye, amutela mmohi onooraruwana, onamuthegela mwihiyanaaye. ¹²Emodha-modhave teto mwihiyana amwalana ni mamune ateliwa ni mmohi, onooraruwana”.

Yesu onowaareeliha ahima

(Matewuzhi 19.13-15; Luka 18.15-17)

¹³Vevale athu amohi yowaadhaagana aniiwa wa Yesu wi aahela madaa aareelihe, mbwenye anamasuza yowaahiihaga. ¹⁴Yesu agoonile ahitakaleliwaga, wiira: “Ahiyeni ahima edhe wa miyo, kamwaahiihe, vovi Omwene wa Mulugu bwa athu enaligana ni aliwa. ¹⁵Ebaribareene ginowuwaaddelani wi ole ohunaakele Omwene wa Mulugu wona mwaana, kadha avolowamo”. ¹⁶Nuwindo, ahaakubaarelaga ahima ale, waahela madada, wareeliha.

Muthu ooreela

(Matewuzhi 19.16-30; Luka 18.18-30)

¹⁷Vevale Yesu agavenyile wi adhowege, muthu mmohi ahimuthamagelaga, odha okokora vameentoni vaaye omukoha, wiira: “Namasuuziha apama, gineere ddi wi gaakele egumi yoohumala?”

¹⁸Yesu ahimwaakulaga, wiira: “Onaggiirela ddi apama? Kalivo oli apama, apama di Mulugu baahi. ¹⁹Ohaanona malamulo: ‘Kumpe muthu, kuraruwe, kawiiye, kumwiinkedhe mukwaawo, kumunyengethe mukwaawo, waarihege ababo ni amaayo’ ”.^r

²⁰Muthu ole ahiiraga: “Namasuuziha, dhaatedhene dhedho gambeele ohara ngali muzombwe”.

²¹Yesu ahimwing'anaga omudhivela, omwaaddela, wiira: “Ehuuhaleela yego emohi: Dhowa wagulihe dhaatedhene dhinniiwena. Korowadha waavahe athu oorabula, dhooreela onoodha ofwanye odhulu. Weera ndo, ogiharege”.

²²Muthu ole ageewile madhu ale kove yaaye yahivololaga, ovenyavo agali owukuuweene, vovi ahikanna dhooreela dhijinji.

²³Yesu ahawaang'anaga anamasuza aaye yamwapeelege, wiira: “Dhili dhoorusa vajinji wi athu ooreela evolowe muMweneni wa

^p 10.6 Moone Wambeela 1.27 ^q 10.8 Moone Wambeela 2.24 ^r 10.19 Moone Okuma 20.12-16; Deteronomiyo 5.16-20

Mulugu!”²⁴ Anamasuuzwa yahitikinaga vajinji madhu a Yesu. Mbwenye oliye ahiwelelaga owoga, wiira: “Ebaribareene, nyo ahima aaga, dhili dhoorusa vajinji wi athu ooreela evolowe muuMweneni wa Mulugu!”²⁵ Eli yookweya kamelo ovira mookupula mwa singano, ohiyana wi athu ooreela evolowe muuMweneni wa Mulugu”.

²⁶ Vevale anamasuuzwa ale yahitthabwaga otikina, wambeela okohana-ga, yiiraga: “Akala dhili ndo, ki onaande ovolowa baani?”

²⁷ Yesu ahaasugwaga, wiira: “Ndo soohaandeya wa athu, mbwenye ka-huwo ni Mulugu. Dhego dhaatedhene dhinaandeya ni Mulugu”.

²⁸ Vevale Peduru ahambeelaga owoga ni oliye, eeraga: “Hiyo nihihiya dhaatedhene wuuharagani”.²⁹ Yesu ahaakulaga, wiira: “Ebaribareene ginowu-waaddelani wi ole onahiya nyuba yaaye, addibile, arogoriye, naari onaahiya amaaye, ababe, anaaye, midda dhaaye mwaha wa miyo ni mwaha wa Muselu Wapama,³⁰ oyene vati vano onoodha aakele dila zana okwaranya dhihiyiliye, nyuba, addibila, arogora, amaaye, ahima, midda ni wiiddiwa. Vano osogolowa onoodha aakele egumi yoohumala.³¹ Vowi athu ajinji eli owambeela enoodha ekale oogomihedha, ale eli oogomihedha binaakale owambeela”.

Yesu onowoga dila ya neethaaru dha okwa waaye ni ovenyihiwa
(*Matewuzhi 20.17-19; Luka 18.31-34*)

³² Egali voolenddoni woodhowa oZheruzalemi, Yesu aaligi osogolo wa anamasuuzwa aaye. Anamasuuzwa ale yegi otikina vajinji, vevale athu amohi yaaharaga yowoovaga. Yesu ahawiithanelaga ombale anamasuuzwa ale kumi ni abiili, wambeela wawaaddela dhedho dhaamwiireyele.³³ Ahiiraga: “Mwiiwe, nili voolenddoni woodhowa oZheruzalemi. Wewo, miyo, Mwaana a Muthu, gineere opelekiwa mmadani mwa apogo a anamakutha ni anamasuuziwa a Malamulo. Aliwa eneere olamula wi gipiwe. Yeera ndo enogipeleka wa athu oode.³⁴ Ayene eneere egibeddege, egitaperege mare, egiwaxulege, vano egipe. Mbwenye vavira malabo maraaru, miyo ginovenyihiwa muukwani”.

Dhooloba dha Tiyago ni Zhuwawu
(*Matewuzhi 20.20-28*)

³⁵ Tiyago ni Zhuwawu, ahima a Zebedeo, yahimwaaddelaga Yesu, wiira: “Namasuuziwa, nnafunu nuulobeni yego wi muniirele”.³⁶ Yesu ahaakohaga, wiira: “Munafuna guwiireleni ddi?”³⁷ Aliwa yahiiraga: “Nnafuna wi vevo vineeriinyu mukale munthithimihoni mweenyu, munikaraatihe mmohi omoononi weenyu wooja, mmohiwa omoononi woong'oto”.³⁸ Mbwenye Yesu ahiiraga: “Kamunonile enalobiinyu. Dhino-waandeya nyo omung'wela nakoma^s a goyi onaamung'weliimi? Naari munowaanda waakela obathizo woorabuliha onabathiziwiimina?”

^s 10.38 Naari wi: *kopo*. Moone teto maverisikulu 39-40.

³⁹Aliwa yahaakulaga, wiira: “Ee, nnowaanda”.

Vevo Yesu ahiiraga: “Dhikhikala pama, nakoma oyene gineeriimi gimung'wege munowaanda omung'wa, obathizo gineeriimi gibathizi-wena, munobathiziwana. ⁴⁰Dhinowaandeya nyo omung'wela nakoma a goyi onaamung'weliimi; mbwenye okaraati omoononi waaga wooja naari woong'oto, kahuwo miyo onarumeedhiha, dhili ni ale yaasasanyedheliye”.

⁴¹Vevale amohiwa ale kumi veewiligiisu madhu ale yahitakaleliwaga ni Tiyago ni Zhuwawu. ⁴²Mbwenye Yesu ahawiithanaga anamasuuzaa aaye ale wawaaddela, wiira: “Nyoovo muhunona ale eneriwa oolamula a mulogo enowaajela aliwa, vano apogo eewa binaalamula aliwa. ⁴³Mbwenye vaari veenyu dhihiireyege ndo. Onafuna okala mpogo, akalege mwiimeleli eenyu. ⁴⁴Teto onafuna okala musogoleli vaari veenyu, akalege mudhaari a nyoovo mwaatene. ⁴⁵Mwiiregena wona dhiirile miyo, Mwaana a Muthu, kagidheelee wi giimeleliwege, mbwenye wi gawiimelelege athu ni oveleela egumi yaaga wi gawooble athu ajinji”.

Yesu onomuyiliha muliba ohoona
(*Matewuzhi 20.29-34; Luka 18.35-43*)

⁴⁶Yesu ni anamasuuzaa aaye ni anamwinji yahifiyaga nluwa na oZheriko. Ekumaga nluwa ndde, yahimfwanyaga muthu ohoona ooloba-loba agakaraatile seresere ya rampa. Muthu ole ndina naaye aali Baratimeyu, mwaana a Timoni. ⁴⁷Vano oliye ageewile wi Yesu a oNazarethi dinavira, ahambeelaga okuwa, eeraga: “Yesu, Mwaana a Davidi,^t mugeeddiwele thagaraga!” ⁴⁸Anamwinji yomwihiihaga wi amaale. Mbwenye oliye oolibihedhagave okuwa, eeraga: “Yesu, Mwaana a Davidi, mugeeddiwele thagaraga!” ⁴⁹Yesu ahiimelaga wawaaddela athu, wiira: “Kamwiithaneni”. Athu ale yahimwiithanaga ohoona ole, omwaaddela, wiira: “Wiilibihedhe! Ovenye! Onowuwiithana!” ⁵⁰Vevale Baratimeyu ahithathilaga yowiikuneelana yaaye, othamagelaga wa Yesu. ⁵¹Yesu ahimukohaga, wiira: “Onafuna guwiirele ddi?” Ohoona ole ahaakulaga, wiira: “Namasuuziha, ginafuna goonege!” ⁵²Yesu ahimwaaddelaga, wiira: “Maruwa odhowege; nrromelo naawo nuhuuvulumusa”. Mudhidhi olene, ahambeelaga woona, omuharaga Yesu mulenddoni mwaaye.

Yesu onovolowa muZheruzalemi ni ovuwa
(*Matewuzhi 21.1-11; Luka 19.28-40; Zhuwawu 12.12-19*)

11 ¹Yesu ni anamasuuzaa aaye yaaddamelaga oZheruzalemi, vakukuuve oBetifazhe ni oBetaniya, waaddamela Mwaango wa Olivera, Yesu ahaarumaga anamasuuzaa aaye abiili, ²wawaaddela, wiira: “Dhowani mudhi onooniinyu oyo. Mwaavo-

^t **10.47** Mwaana a Davidi Ndda naali ndina nimohi na Misiya nanoniwiiyena ni aZhudewu. Moone teto verisikulu 48.

lowagawene munomfwanya mwaana a buuru agamageleliwe, ohunagweliwege ni muthu; mmutapule, mmudhena. ³Muthu onookoheni, eera: ‘Nyo eneriinyu eyo ddi?’ Mmwaakule, mwiire: ‘Nabwiya dinamfuna, mowaaguva onomuveliha’”. ⁴Anamasuuzale yahidhowaga omfwanya mwaana a buuru agamageleliwe vamavolowelo va cinga, waaddamela mundila, omutapula. ⁵Athu yaaligi vevo egawoonile, yahaakohaga, wiira: “Eneriinyu eyo ddi, munamutapulela ddi buuru oyo?” ⁶Anamasuuzale yahaakulaga wona mwemo Yesu mwawaaddeligiye. Nuwindo, athu ale yahaarumeedhihaga omudhowana buuru ole. ⁷Anamasuuzale yahimudhaagana buuru ole vaaligi Yesu. Yahitadeelaga dhoowara dheewa vamutanani wa buuru^u ole, Yesu ogwelavo. ⁸Athu ajinji yootadeelaga dhoowara dheewa murampani, amohiwa yootadeelaga matadu a mithanko yaakotholigiwa mukokolani. ⁹Athu aatene yasogolilege vamohi ni ale yaaligi mundduli mwa Yesu, yookuwaaga, yiiraga:

“Hozana!” Ooreelihiwa di oyene onadha mundina na Nabwiya!”^w

¹⁰ *“Woriiheya bu Omwene onadha wa nikolo neehu Davidi!”*

“Hozana a mudhulu-dhulu!”

¹¹ Yesu ahivolowaga muZheruzalemi, ofiya nyuba ya Mulugu woona dhaatedhene dhaali mwemo, ahikumagamo odhowaga oBetaniya vamohi ni anamasuuzale aaye ale kumi ni abiili, vovi vaaligi ciguwo.

Yesu onodduba mfigera

(Matewuzhi 21.12-17; Luka 19.45-48)

¹² Obebehini wiwa evenyaga oBetaniya wule, Yesu ahikalagana dala. ¹³ Ahoonaga muthanko wa mfigera^x (onaligana ni namutaambwi) voolapelavene oganna mataakuruve, ahifiyagavo wi oone akala aaddodevo furuuta dhiwa. Mbwenye kaafwanyilegemo yego, afwanyilegemo mataakuruve baahi, vovi kawaali mudhidhi woovaha dhoovaha. ¹⁴ Vevale ahiwogaga ni muthanko ole, wiira: “Muthanko we, wambeela peeno ahikalevo onaadhe aje dhoovaha dhaawo”. Madhu ale anamasuuzale yahawiiwaga.

^u 11.7 Moone Zakariya 9.9 ^v 11.9-10 Hozana mu ewogelo ya eHeberi enatapulela Nabwiya nivulumuseni, naari wi: Athithimihiwe. Moone teto verisikulu 10.

^w 11.9 Masaalimu 118.25-26 ^x 11.13 Mfigera bu muthanko onavaha furuuta dhooligana ni furuuta dha namutaambwi. Moone teto maverisikulu 20-25.

Yesu onoweeliha nyuba ya Mulugu
(*Matewuzhi 21.12-17; Luka 19.45-48*)

¹⁵Aliwa yahifiyaga oZheruzalemi. Yesu ahivolowaga vathaddo^y va nyuba ya Mulugu, wambeela wathamagihamo athu yamweeddaga nagooso mwemule. Ahaatongwihaga meeza vacenjiwaga korowa ni dhittengu dha anamaguliha kangayiwa. ¹⁶Teto kaahiyilege wi athu evirege vathaddo va nyuba ya Mulugu egathukule dhego. ¹⁷Vano ahambeelaga waasuuziha, eeraga: “Kadhilebiwe wi:

“*Nyuba yaaga eneethaniwege
nyuba ya matugumano a malobelo
a malogo maatene*”^z?

Mbwenye nyo muhusaddula okala nikungu na ambava”.⁴

¹⁸Apogo a anamakutha ni anamasuuziha a Malamulo egeewile dhedhi, yahambeelaga osayela mukalelo wowi empe. Aliwa yoofunaga wiirana nda, vowi yoomoovaga Yesu mwaha wi athu aatene yootikinaga dhoosuuziha dhaaye.

¹⁹Vigaribile, yahivenyagawo oluwani wule.

Dhoosuuziha dha mfigera ole wooddubiwa
(*Matewuzhi 21.18-22*)

²⁰Omenseloni wiwa mudhidhi wa bebehni yeeddaga murampani yahoona-ga muthanko wa mfigera ole ogommile wambeela vati ni misisidhene. ²¹Vevo Peduru ahuubuwelelaga madhu ale, omwaaddela Yesu, wiira: “Namasuuziha, koonani mfigera ole mwaddubiliinyu, ohumma”. ²²Yesu ahimwaakulaga, wiira: “Mukalena nrromelo mwa Mulugu. ²³Ebaribareene ginowuwaaddelani wi mwakalana nrromelo kadda muthu oneerege wiirela mwaango ola: ‘Ovenyevo, wakale munyaza’, awogaga moohaanganyedha, dhiwogiliye dhineerege wiireya wona muwogeliye. ²⁴Mwahaya buuyene ginowaaddeliimini wi mwaalobelaga mmulobaga Mulugu yego eli yaatene, muroromelege wi muhaakela teto muneerege waakela. ²⁵Vano mwaafunaga olobela, mwambeelege waalevelela akwiinyu, akala muhukalana mwaha. Mweera ndo, Babiinyu oli odhulu onowuulevelani dhoothege dheenyu. ²⁶[Mbwenye akala nyo kamunaalevelela akwiinyu, Babiinyu oli odhulu, kadha alevelela dhoothege dheenyu”.]

Yesu onokohiwa dha owodha waaye
(*Matewuzhi 21.23-27; Luka 20.1-8*)

²⁷Dhigavirile nde, yahiwelelaga oZheruzalemi. Yesu eddeeddaga mu nyuba ya Mulugu, apogo a anamakutha, anamasuuziha a Malamulo

^y 11.15 *Vathaddo va nyuba ya Mulugu* onaagiwana mburo waapeelele nyuba ya Mulugu athu vagulihiiwa nagooso wi eveleelege mvahi mu nyuba ya Mulugu. ^z 11.17 Ezaya 56.7

^a 11.17 Moone Zheremiya 7.11

ni makolo a mutugumano yahimwaaddamelaga ²⁸ omukoha, wiira: “Onaaddele owodha oneeriwena dhego dhi okumilena waani? Wuuvahile owodhawo wowiiragana dhego dhi baani?” ²⁹ Yesu ahawaakulaga, wiira: “Miyo teto ginowuukohani yego emohi. Mwagaakula, ginowuwaaddelani ogivahile owodha oneeriimina dhego dhi. ³⁰ Mugaakule: Amvahile Zhuwawu Namabathiza owodha wi abathizege aali Mulugu, yaali athu?”

³¹ Aliwa yahambeelaga okohana vakaleligiisu, yiiraga: “Neera amvahile di Mulugu, ononikoha eere: ‘Ki mudhe muhumurumeedhege?’ ³² Teto neera avahiwe ni athu”. Aliwa yowawoovaga athu vowi aatene yeera ebaribarene Zhuwawu aali namavuhulela. ³³ Mowindo yahaakulaga, wiira: “Hiyo kanimunonile”. Vano Yesu ahawaaddelaga, wiira: “Naari miyo teto kaginowaaddelani okumiliimina owodha oneeriimina dhego dhi”.

Musibe wa anamalima abure

(Matewuzhi 21.33-46; Luka 20.9-19)

12 ¹ Dhigavirile nde Yesu ahambeelaga owoga ni aliwa mwa musibe, eeraga: “Mulobwana mmohi alimile mudda wa uuva. Ahaapeleliha cinga, osasanyamo moovoddela uuva, omaga sanja yowiiing’anela, nuwindo mudda ole ahibolihaha^b wa anamalima amohi, ovenyavo odhowa elabo emohiwa. ² Ogafiyile mudhidhi woohadda, muliba mudda ahimurumaga mwiimeleli aaye wa anamalima ale wi aakele dhoovaha dha uuva dha mmiddani mule. ³ Mbwenye anamalima ale yahimwihiddaga omuddwadha, omuweliha ehimvahile yego. ⁴ Muthu ole ahimurumaga mwiimeleli mmohiwa, mbwenye anamalima ale yahimuddwadhaga muru, omuruwana. ⁵ Muliba mudda ahimurumihaga teto mmohiwa, aliwa ompa. Ahaarumaga amohiwa ajinji, mbwenye anamalima ale yahaaddwadhaga amohi, amohiwa yahaapaga.

⁶ “Ahalilege mmohi baahi, omurumawo mwaana onamudhiveliye, wiira: ‘Ola oli mwaanaga, enomuriha’.

⁷ “Anamalima ale yahaaddelanaga mmohi ni mukwaaye, yiiraga: ‘Ola di namahalana mudda, nimpe, nihalena mureeleloya’. ⁸ Vano yahimwihiddaga mwaana a mwiinya ompa, ovokedha muruthuya ode wa cinga na mudda ole.

⁹ “Vano miyo ginowuukohani: Ki muliba mudda ole adhaaga onawiirena avi anamalima ale? Oliye onoodha aape, eera ndo aabolihe amohi muddaya. ¹⁰ Nyo kamuneelengege Maleba Ootaleleya? Yiire:

“*Nibwe nenddo nakooddile anamamaga nyuba,
ndda nihisadduwa okala nibwe noohiddeela nyuba.*

^b 12.1 Abolihaha mudda ndala wakala wowiiwananela wi aveleelege epaddi vang’ono ya dhilo ahadda mmuddani mule.

¹¹ *Nabwiya deerilena dhedhi, dhili dhootikiniha vameentoni veehu’ ”.*^c

¹² Apogo a anamakutha ni anamasuuziha malamulo egeewelemo wi musibe ole Yesu aasibaga aliwa, yoosayelaga omwihidda. Mbwenye yawoovaga athu, yahimwihiyaga, aliwa ovenyavo.

Opeleka musoko wa Sezari

(*Matewuzhi 22.15-22; Luka 20.20-26*)

¹³ Vooharela athu amohiwa a nikuru na aFarizi ni amohi a nikuru na Heroddi yahirumiwaga wi yamuwage muwano Yesu. ¹⁴ Egafiyile, yahiiraga: “Namasuuziha, nihinona wi nyo munowogave ebaribari teto kamuna-moova muthu, kamuneelenga wi ola baani, mbwenye munosuuziha dila ya Mulugu ni ebaribari. Dhinorumeedheya naari kadhinarumeedheya opeleka musoko wa Sezari? Nipelekege naari kanipelekege?” ¹⁵ Mbwenye vowi Yesu ahinonaga moobuwelo eewa oonyengetha, ahiiraga: “Munageehela ddi? Kadhanaani korowa emohi ya parata^d goone”. ¹⁶ Aliwa yahimwinkaga korowa ya parata, oliye ahaakohaga, wiira: “Kove elivo sawani? Ki ndina nilebiwevo thawani?” Aliwa yahaakulaga, wiira: “Dha Sezari”.

¹⁷ Vano Yesu ahawaaddelaga, wiira: “Mumvahege Sezari eli ya Sezari, mumvahege Mulugu eli ya Mulugu”.

Aatene egeewile madhu ale, yahitikinaga.

Ovenyihwa muukwani

(*Matewuzhi 22.23-33; Luka 20.27-40*)

¹⁸ Nuwindo, aSaduseyi amohiwa yahidhaaga omwaaddamela Yesu, ala baayene eneera kawuli ovenyihwa muukwani, yahimukohaga, wiira: ¹⁹ “Namasuuziha, Mozezi ahileba nlamulo nowi, mulobwana akwa amwihya mwihiyanaaye ahinna ahima, ddibile amutelege maamukweleya wi ambalele ahima ddibile ole yeelengiwege ahima a mwanookwa. ²⁰ Dha-hiireya ndala yahikalawo addibila atanu ni abiili. Owambeela ahimutela mwihiyana, oliye okwa, ahimbalilena mwaana. ²¹ A nabiili omutela maamukweleya teto okwa ahimbalile mwaana. A neethaaruu dhahiireya mukalelo mmohive oyene, ²² Kaalivo mwa atanu ni abiili ale ambalile mwaana teto omagomihedhowa mwihiyana ole okwa. ²³ Ki nlabo na omavenyihiwelo muukwani, athu yadha evenyihiwaga muukwani mwihiyana ole onadha eeriwege mwadha wani, vowi addibila aatene atanu ni abiili ale yahimutela?”

²⁴ Yesu ahawaakulaga, wiira: “Munaviriganihela mwaha woohunonelamo Maleba Ootaleleya, naari owodha wa Mulugu! ²⁵ Vowi nlabo

^c 12.11 Masaalimu 118.22-23 ^d 12.15 Naari wi: *denariyo*. Denariyo yaali korowa yawale ya parata ya oRoma mutheengo waliveliwa namalaba alaba nlabo nimohi.

noovenyihwa muukwani nafiya, kalivo onatelege naari oteliwa. Aatene munaakale wona angero a odhulu. ²⁶Mbwenye dhoovenyihwa muukwani, nyo kamweelengile muniivuru na Mozezi madhu enawoga dha nikupu nahiddaga munddo? Vevale Mulugu ahimwaaddelaga Mozezi, wiira: ‘Miyi gili Mulugu a Abarhamu, Mulugu a Ezaaki ni Mulugu a Yakobo?’^e ²⁷Mulugu kahuwo Mulugu a athu ookwa, di Mulugu a athu ookalawo. Ebaribareene nyo muhuholowa!”

Nlamulo noofuneya

(*Matewuzhi 22.34-40; Luka 10.27*)

²⁸Namasuuziha mmohi a Malamulo ahimwaaddamelaga Yesu, omvuruwanaga dhavaanyihanigiwa. Ageewile wi Yesu ohawaakulaga pama aSaduseyi ale, ahidhaaga waaddamela vaaligi Yesu, omukoha, wiira: “Mwa Malamulo maatene nuulubale thiivi?”

²⁹Yesu ahimwaakulaga, wiira: “Nlamulo nuulubale thi nddi, ‘Mwiiwe nyo aEzarayeli! Nabwiya Mulugu eehu, di Nabwiya mmohive. ³⁰Omudhivelege Nabwiya Mulugu aawo ni murima waawo waatene ni egumi yaawo yaatene, wiiwelelamo waawo waatwene ni kopolo dhaawo dhaatedhene’.^f ³¹Nlamulo na nabiili thi nddi: ‘Omudhivelege mwaaddamani aawo wona muneedhiveliwe.’^g Kaniliwo nlamulo nimohi noofuneya okwaranya alena”.

³²Namasuuziha a malamulo ole ahiiraga: “Nabwiya muhaakula pama muwogiliinyumo wi Mulugu di mmohi, kaliwo mmohiwa ahili oliye yeeka. ³³Teto muhuwoga pama mwiiriliinyu nimudhivelege Mulugu ni murima weehu waatene, wiiwelelamo waawo waatwene ni kopolo dheehu dhaatedhene teto naadhivelege amwaaddamani eehu wona muneedhiveliu, mwaha wowi dhaatedhene nda, dhinofuneya okwaranya opeleka mukutho wa aneenyama oopahiwa, naari mikutho dhimohi dhoohiyana-hiyana”.^h

³⁴Yesu veewiligiiye waakula ni ononelamo wa namasuuziha ole, ahimwaaddelaga, wiira: “We kulapele ni Omwene wa Mulugu”. Agawogile ndo, kaalivo mmohi axixile omukoha yego.

Kirixtu di Nabwiya a Davidi

(*Matewuzhi 22.41-46; Luka 20.41-44*)

³⁵Yesu aasuuzihaga athu mu nyuba ya Mulugu ahaakohaga, wiira: “Mwaha bwaddi anamasuuziha a malamulo enawoga, yiiraga: ‘Kirixtuⁱ di Mwaana a Davidi?’ ³⁶Mwiinyeene Davidi odheela mwa Muneba Wowee-la, ahiiraga:

^e 12.26 Moone Okuma 3.6 ^f 12.30 Deteronomiyo 6.4-5 ^g 12.31 Levitiku 19.18

^h 12.33 Moone Ozeya 6.6 ⁱ 12.35 Kirixtu mu ewogelo ya eGerego enatapulela *Muthikitheliwi*, Misiya, naari wi: *oosakuliwa a Mulugu*, oyene onaavulumuse athu.

“*Nabwiya Mulugu ohuwoga wa Nabwiya aaga, wiira: Okaraati omoononi waaga wooja ofiyedha gaahale amwiiddani aawo vati va manyalo aawo.*”^j

³⁷Akala mwiinyeene Davidi onamwiira ‘Nabwiya’, onaakale addi mwaanaye?”

Anamwinji yoomwiiwaga ni odhiveliwa.

³⁸Aasuuzihaga, ahiiraga: “Pole-pole ni anamasuuziha a Malamulo. Enodhiveliwa owara mikanjo dhoolapa efunaga olojeliwa ni nriho mburo dhowooneya. ³⁹Aliwa enodhiveliwa okaraatela dhittengu dhowambeela mu nyuba dha matugumano, enothamagela okaraatela dhittengu dhowambeela, mburo dha nriho, mmathangani. ⁴⁰Aliwa enowaawaddihedha amaamukwele wi eveleelege dhookalana dheewa, enowiirana malobelo oolapa moonyengetha. Athu ala enoodha elagiwe mookwaranya”.

Yooveleela ya maamukwele oorabula

(Luka 21.1-4)

⁴¹Nlabo nimohi Yesu ahikaraatigi waaddamela vaaligi kaxa ya dhoo-veleela mu nyuba ya Mulugu, owaasugwaga athu mamorihedhelomo korowa dheewa dha gwingwi. Ooreela ajinji yoohelagamo korowa dhijinji.

⁴²Ahidhaaga vevale maamukwele mmohi oorabula omorihedhamo korowa biili dhing'onong'ono dha gwingwi dhinaligana ni sentaavu. ⁴³Yesu ahawiithanaga anamasuuzi aaye, wawaaddelaga, wiira: “Ebariba-reene ginowuwaaddelani wi mwihiyana oorabula ola, ohuhela mukaxani mu waakwaranya aatene! ⁴⁴Ginawoga ela vowi aatene ehelilemo moothapa, mbwenye oliye moorabula mwaaye ohupeleka dhaatedhene dhanniyena, dhafuniye wiikamihedhana”.

Etoonyihedho ya makuthulo a dhaatedhene

(Matewuzhi 24.1-35; Luka 21.5-37)

13 ¹Vevale Yesu akumaga mu nyuba ya Mulugu, namasuuzi aaye mmohi ahimwaaddelaga, wiira: “Namasuuziha, moone mamagi-welo ni oriya wa mabwe a nyuba ya Mulugu!”

²Yesu ahimwaaddelaga, wiira: “We onootikina nyuba dhuulubale nda? Kunaakale nibwe vadhulu va nibwe nikwaaye nihinaadhe nihibwanyuliwe”.

³Yesu agakaraatile vaMwaangoni wa Olivera wang'anana ni nyuba ya Mulugu, Peduru, Tiyago, Zhuwawu ni Andire yahidhowaga omukoha ombale, wiira: ⁴“Kanaaddeleni dhego dhedho dhineereyege alini?”

Kanaaddeleni etoonyihedho enooniha wi dhego ndi dhineere wiireya siivi?”⁵ Vano Yesu ahambeelaga wawaaddela, eeraga: “Pole-pole ahika-levo oneere ooholoseni. ⁶Vowi enoodha efiye athu ajinji mundina naaga, yiirege: ‘Miyi gili oliyeene’. Eneere waaholosa athu ajinji. ⁷Muhukuu-we mweewaga miselu dha koddo naari dhooruma dha koddo, mwaha wi dhego ndo soofuneya wi dhiireye, mbwenye makuthulo kinafiye. ⁸Mwaha wi nlogo nneerege owana koddo ni nlogo nimohi, omwene oneerege owana ni omwene omohi. Mburo dhoohiyana-hiyana onoodha okalewo othikeya wa elabo ni dala. Dhoopadduwa nda dhinaakale dhoooligana ni dhoovoreya dha mwihiyana mudhidhi wa obala.

⁹“Pole-pole, muxage! Muneerege omagiwa muthukuleliwege mmithegoni mwa miladdu, muwaxuliwege mu nyuba dha matugumano. Teto muthukuleliwege vameentoni va makuminadori ni va mamwene, mwaha wa ndina naaga, vovi munogiirela onamoona teto mwiirelaga onamoona wa Muselu Wapama. ¹⁰Ndo dhineereye mwaha wi soofuneya vowambee-la olaleyiwe Muselu Wapama wa malogo maatene. ¹¹Nyo mwamagiwa, muthukuleliwa mmuthegoni mwa miladdu, kamukathamiheyege mudhidhi ohunaakwane mwiiraga: ‘Nnaawoge ddi?’ Mudhidhi olene muwogege eyene muneerigiinyu mvahiwege, vovi kahuwo nyo munawogege, mbwenye Muneba Woweela bunawogege.

¹²“Addibila eneerege waapeleka addibiliwa wi epiwege, abaabi eneerege waapeleka aniiwa, ahima eneerege wawiinyuwela abaabi-wa yaapeelaga wi epiwe. ¹³Nyo muneerege wiiddiwa ni athu aatene mwaha wa ndina naaga, mbwenye ole onaavilele ofiyedha omakuthulo onoodha avulumusiwe.

¹⁴“Mwadha moona yoonyakavala yoobwanyula egali vamburoni vahafwaneleliwa,^k (ole oneelenga eewelemo). Ole onaakale oZhudeya athawele omwaangoni. ¹⁵Ole onaakale vadhulu va nyuba, athawe mowaaguva, kavolowe mba wi athukule dhego. ¹⁶Ole onaakale omudda athawe mowaaguva, kawelele vaade wi athukule kasaako yaaye. ¹⁷Ooddilu ba ahियana enaakalena wari mudhidhi oyene teto enawaamwihege ahima. ¹⁸Lobelani wi dhego dhi dhinaadhe dhiireye mudhidhi wooddiddila. ¹⁹Mwaha wi mudhidhi oyene okubanya ni masooso enaakalewo kinakalegewo wambeela Mulugu vipaddusiliye elabo ofiyedha peeno. Teto kadhidha dhiireya dila emohi. ²⁰Nabwiya aheere ahaavugula malabo ayo, kalivo muthu naari mmohi aavulumusiwe. Mbwenye malaboya waavugulele mwaha wa athu yaasakuliliye. ²¹Vevo muthu mmohi owaaddelani, eeraga: ‘Moone! Kirixtu^l ole aroromelihiwe oli va!’ naari eeraga: ‘Ole oli wule!’ kamurumedhe.

^k 13.14 Daniyeli 9.27; 11.31; 12.11 ^l 13.21 Kirixtu mu ewogelo ya eGerego enatapulela Muthikitheliwi, Misiya, naari wi: oosakuliwa a Mulugu, oyene onaavulumuse athu.

²²Ginawogela ela vowi eneere okumelela athu ajinji ooratha eneerege nili ‘Kirixtu ole aroromelihiwe,’ ni anamavuhulela ajinji ooratha, eneeregena dhitoonyihedho ni dhootikiniha ni mukalelo wowi dhaandeyaga yanyengethege ni oosakuliweene a Mulugu. ²³Mbwenye nyo muxage miyo ginowuwaaddelani dhaatedhene dhihinapadduwe.

Odha wa Mwaana a Muthu

²⁴“Egavirile malabo ayene a masooso, osogolowa,
“*‘nduwa nnoodha nrife, mweeri kunaamoneyege,*

²⁵ *ttendderi dhinoodha dhimorewo odhulu.*

Kopolo dha odhulu dhinoodha dhithikeye’.^m

²⁶“Vevo athu aatene enoodha emoone Mwaana a Muthu adhaaga mmiraboni ni owodha wuulubale ni nthithimiho.” ²⁷Oliye oneere waaruma angero aaye wi yaatugumanye oosakuliwa a Mulugu a elabo yaatene, dhipaddi nnayi dha mmagomelo mwa elabo ya vati ni ya odhulu.

²⁸“Musuuze dhinasuuziha namutaambwi,^o moonaga mijindda dhiwa dhambeelaga ofeewa mataakuru epwedheyaga, nyo munonona wi elimwe ehaaddamela. ²⁹Mwa mukalelo mmohive nyo mwadha moona dhego dhedhi dhipadduwaga, munone wi Mwaana a Muthu ohaaddamela oli vamulagovene. ³⁰Ebaribareene ginowuwaaddelani wi nlogo nenddi kannamale nda dhaatedhene dhihinapadduwe. ³¹Elabo ya vati ni odhulu dhinoodha dhimale, mbwenye madhu aaga kidha emala.

Nlabo noomariha kaninoneyile

(Matewuzhi 24.36-51)

³²“Mbwenye dha nlabo nddo ni mudhidhiya kalivo ononile, naari angero a odhulu, naari Mwaana, ononile di Babe baahi. ³³Mowindo muxage! Mukalege owiisasanyedheleene mwaha wi kamunonile mudhidhiya onafiya alini. ³⁴Dhili wona muthu onavenya mwiilaboni mwaaye, ahiya vaade vaaye mmadani mwa amwiimeleli kadda muthu ni mabasa aaye, amuruma namaang'anela wi akale meento. ³⁵Ninyeene teto eng'anelani, mwaha wi kamunonile mudhidhi onadha afiye muliba nyuba; onowaanda ofiya ciguwo, vaari ni vaari va mahiyu, omaselo naari ogasile. ³⁶Oliye adhaaga moorumusa, ahuufwanyeni mugonaga. ³⁷Dhinowaaddeliimini ndi ginowaaddelani mwaatene, mukale meento!”

^m 13.24-25 Ezaya 13.10; 34.4 ⁿ 13.26 Moone Daniyeli 7.13; Ovuhulela 1.7

^o 13.28 Naari wi: *namutaambu*.

Opanganela dha ompa Yesu

(*Matewuzhi 26.1-5; Luka 22.1-6; Zhuwawu 11.45-57*)

14 ¹Egahalile malabo meenddi a Othabela wa Paxkwa^p ni a Othabela wa Mikathe Dhoohuheliwa Emela, apogo a anamakutha ni anamasuuziha a Malamulo yoosayelaga mukalelo woomwihidda Yesu, moohunoneya ni athu wi empe. ²Aliwa yowiiraga: “Kaniirena dhedho mudhidhi wa Mathanga a Paxkwa ola wi nnaadhe nitatamule wiinyuwela wa athu”.

Mwihiyana mmohi onomukuthulela makura Yesu oBetaniya

(*Matewuzhi 26.6-13; Zhuwawu 12.1-8*)

³Nlabo nimohi Yesu aaligi oBetaniya mu nyuba ya Simawu, aali muliba mareda.^q Mudhidhi wooja ahifiyaga mwihiyana mmohi adhiilegena garaafwa na alabasuturu,^r mwaaligi makura oonukwela a mutheengo wookwima eneeriwa naarudu. Ahipwesaga garaafwa ndde, makuraya omukuthulela Yesu mmuruni.

⁴Athu yaaligi vevale yahitakaleliwaga yoowogaga mmohi ni mukwaaye, yiiraga: “Onoongele ddi makura ala? ⁵Makura ala aheere waaguliha, korowa dha parata dhowaakwana mazana maraaruru (300),^s korowadha eere waagawela athu oorabula!” Yahambeelaga omwaaba mwihiyana ole.

⁶Yesu ahaasumululaga, wiira: “Kamwihiyeni! Munamukathamihela ddi? Egiireliiye sapama. ⁷Athu oorabula enaakalege ni nyo malabo maatene, mwafuna muneerege waakamihedha, mbwenye miyo kaginaakalege vamohi ni nyo mudhidhi waatene. ⁸Oliye wiirile dhaandiliiye wiirana okuthulela makura mwiili waaga, mowinda ohusasanyedha ologohiwa waaga. ⁹Ebaribareene ginowuwaaddelani wi oli waatewene mwiilaboni onaalaleyiwege Muselu Wapama ola, athu eneerege omuwoga mwihiyana ola, emuubuwelelaga mwaha wa dhedho dhigiireliiye”.

Zhuda onowiiwanana ni apogo a aZhudewu dha ompeleka Yesu

(*Matewuzhi 26.14-16; Luka 22.3-6*)

¹⁰Nuwindo, Zhudasi a oEsikariyothi, mmohi mwa anamasuuzi aaye kumi ni abiili, ahidhowaga ogumana ni apogo a anamakutha wi ampe-

P 14.1 *Othabela wa Paxkwa* yaali mathanga oofuneyesesa a aZhudewu. Moone Okuma 12.1-27. Vowi Yesu aveniyihiwe nlabo nenddo na Paxkwa, hiyo dhiinova Paxkwa ehu nathabela oveniyihiwa wa Yesu muukwani. **q 14.3** *Mareda* mu ewogelo ya eGerego kinaagana maredave mbwenye teto dhireda dhoohiyana-hiyana dha nikupa na muthu. **r 14.3** *Alabasuturu* naali nibwe noozhazhaala na mooneyelo oweela nasasanyiwana mino, milinga ni magaraafwa a makura oonukwela. **s 14.5** Korowadha dhowaakwana omulivela muthu alaba yaaka.

leke Yesu wa aliwa. ¹¹Aliwa veewiligiwa dhedho yahidhiveliwaga, yahimuroromeliwaga omvaha korowa. Zhuda wambeela osayela mpatha wowi ampeleke Yesu.

Yooja ya Nabwiya

(*Matewuzhi 26.17-30; Luka 22.7-23; Zhuwawu 13.18-30*)

¹²Nlabo nowambeela na Othabela wa Mikaathe Dhooheleliwa Emela, vapiwa nibila, anamasuza aaye yahimukohaga, wiira: “Munafuna nasasanyedhele waani wi mujewo Mathanga a Paxkwa?”

¹³Yesu ahaarumaga abiili mwa anamasuza aaye, wawaaddela, wiira: “Dhowani muluwani, muneere ogumanana mulobwana agathukule muno wa mahinje, mmuharege. ¹⁴Nyuba eneeriye avolowe mwamwaaddele mwiinya a vaade vo, mwiire: ‘Namasuuziha onokoha wi: suubi a aleddo wi gijemo Mathanga a Paxkwa ni anamasuza aaga oli waani?’ ¹⁵Oliye onowuwoonihani suubi mulubale a mudhulu winna dhego dhaatedhene dhoofuneya. Musasanyedhelemo dhoojadha”.

¹⁶Anamasuza yahimaruwaga, odhowa oluwani yahifwanyaga dhego dhaatedhene wona Yesu mwawaaddeleliye, yahisasanyedhaga Mathanga a Paxkwa.

¹⁷Ociguwoni Yesu ahidhowaga wewule ni anamasuza aaye kumi ni abiili ale. ¹⁸Egakaraatile ejaga Yesu ahiiraga: “Ebaribareene ginowuwaaddelani wi mmohi mwa nyo onaja ni miyo onogiguliha wa amwiiddani aaga”.

¹⁹Aliwa yahambeelaga okubanya, ewogaga mmohi ni mmohi, yiiraga: “Adhe akale miyo?”

²⁰Mbwenye Yesu ahawaaddelaga, wiira: “Di mmohi mwa kumi ni abiili, ole onareha mukaathe muziwo mmohive ni miyo. ²¹Ebaribareene Mwaana a Muthu onookwa wona mulebeliwiwa dha oliye. Mbwenye oddilu oli ni muthu oyene onampeleke Mwaana a Muthu!‘ Yaali yapama muthu oyo aheere ahibaldiwa!”

²²Aliwa ejagave ndale, Yesu ahithukulaga mukaathe, otamaalela wa Mulugu, ogwaddanya, wawinka anamasuza aaye, wiira: “Akelani, muje, ola bu mwiili waaga”.

²³Vooharela ahimuthukulaga nakoma,^u omutamaalela wa Mulugu, waavaha anamasuza aatene, omung'wa.

²⁴Vevale Yesu ahiiraga: “Ola bu mwazi waaga, mwazi wa nipangano no waandana [nixa], onakuthuleliwa wa athu ajinji. ²⁵Ebaribareene ginowuwaaddelani wi kagidha gimung'wa vinyu dila emohi ofiyedha odha Omwene wa Mulugu, ginadhiimi gimung'we vinyu muxa mwemo”.

^t 14.21 Mwaana a Muthu Yesu eyaagagana oliyenene. ^u 14.23 Naari wi: kopo. Moone teto verisikulu 36.

²⁶Vano egeebile njibo noomutamaala Mulugu, yahimaruwaga, odh-waga oMwaangoni wa Olivera.

Yesu onomwaaddela Peduru wi oneere omukoodda
(*Matewuzhi 26.31-35; Luka 22.31-34; Zhuwawu 13.36-38*)

²⁷Yesu ahawaaddelaga aatene, wiira: “Nyo muneere ogithawa, vowi Maleba Ootaleleya yiire:

“*Ginoodha gimporose makambuzi,
vano mabilaya ebalaleye’.*”

²⁸Mbwenye gavenyihiwa muukwani, ginoodhowa osogolo weenyu oGalileya”.

²⁹Peduru ahimwaaddelaga, wiira: “Naari aatene yuuleveni, miyo kaginoolevani”.

³⁰Vevale Yesu, ahiiraga: “Ebaribareene ginowuwaaddela wi mahiyu a peeno mutubi ahinandde ‘Kokoliko’ dila biili, oneere ogikoodda dila thaaru wiiraga kuginonile”.

³¹Peduru ahiilbihedhaga, wiira: “Naari dhakala dhoofuneya wi gikwe, ginookwa vamohi ni nyo, Nabwiya aaga, kagidha gukooddani”. Teto aatene yahiwigaga emohive.

Nlobelo na Yesu oZheesimani
(*Matewuzhi 26.36-46; Luka 22.39-46*)

³²Yesu ahidhowaga ni anamasuza aaye mburo weethaniwa Zheesimani, ahawaaddelaga, wiira: “Mukaraati veva, miyo ginadhowa galobebe”. ³³Ahimuthukulaga Peduru, Tiyaogo ni Zhuwawu. Yesu ahambeelaga ovoreyiwa ni wukuuwa. ³⁴Vano ahawaaddelaga ale araaruru, wiira: “Murima waaga onokubanya goyi yookwana. Mukale veva mwiying'anelege”.

³⁵Ahisusedhaga osogolo vang'ono okokora, olobelaga wi dhakala dhoorumeedheya Mulugu amurabelihe mudhidhi ole wa goyi. ³⁶Oliye ahilobaga, wiira: “Babani, Babani oodhivela! Wa nyo dhego dhaatedhe-ne dhinowaandeya. Miyo ginowuulobani mugirabelihe nakoma ola a goyi.” Vano dhihiireye wona munafuneliimi, mbwenye dhiireye wona munafuneliinyu”.

³⁷Nuwindo, ahiwelelaga waaligi anamasuza ale araaruru aafwanyilege egonaga. Vano ahiwigaga ni Peduru, wiira: “We Simawu, onoogona? Kawaandile ovilela wora emohi? ³⁸Mwiying'anele, mulobelege wi muhimorele moweewiwani. Epaddi emohi muneba oli wooliba, mbwenye mwiili ohulodhowa”.

v 14.27 Zakariya 13.7 w 14.36 *Nakoma ola a goyi* naali nifwanafwaniho nnawoga dha Yesu wi eere orumeedha naari okoodda goyi eyene yamujejiha.

³⁹Dhigeereyile ndo, Yesu ahiwelelaga olobela, alobaga emohive.
⁴⁰Awelagawo dila ya nabiili, aafwanyilege teto egonaga vowi meento eewa yahinyemeliwaga ni kove. Aliwa kayanonaga yoofuna omwaaddela.
⁴¹Vano awelagawo dila ya neethaaru ahiiraga: “Munoogona, mvumaga? Baahi! Mudhidhi ohufiya, Mwaana a Muthu onopelekiwa mmadani mwa anamathega. ⁴²Mvenye! Nidhowege! Mmoone onafuna ogipeleka, ole onowaaddamela”.

Omagiwa wa Yesu

(*Matewuzhi 26.47-56; Luka 22.47-53; Zhuwawu 18.1-11*)

⁴³Mudhidhi oyene Yesu awogagave ndo ahifiyaga Zhudasi mmohi a anamasuuzza kumi ni abiili ale, aavelelaga alobwana ajinji egathukule masupaadda ni golomonddo. Aliwa yarumiwege ni apogo a anamakutha, anamasuuziha malamulo ni apogo a aZhudewu.

⁴⁴Muliba ompeleka ole yahiiwananelaga etoonyihedho, wiira: “Oyene gineeriimi gimulojele ni bezhu di oyene mmwihidde, mmudhowegena, mmwiing'anelege pama”. ⁴⁵Zhuda vafiyiligiye ahimwaaddamelaga Yesu, wiira: “Namasuuziha!”, ombezhari. ⁴⁶Vano athu ale yaaligi ni Zhuda yahifiyaga, omwihidda Yesu, ommaga. ⁴⁷Mbwenye mmohi mwa anamasuuzza aaligi vevale ahixomolaga supaadda, omporosana mwiimeleli a musogoleli a anamakutha, ompadha nibaru na omoononi wooja.

⁴⁸Yesu ahiwogaga ni aliwa, wiira: “Mwaha bwaddi mudheeliinyu ogihidda ni masupaadda ni golomonddo wona gili mbava?” ⁴⁹Miyo gakala ni nyo malabo maatene gisuuzihaga mu nyuba ya Mulugu, nyo kamugihiddile. Mbwenye nda dhineereyele Maleba yaakwanelihiwe. ⁵⁰Nuwindo, anamasuuzza aatene yahimwihiyaga, othawa.

⁵¹Vahikalaga muzombwe mmohi amuharaga Yesu. Oliye eekuneelege ni guwo, kaawarilege yego emohi. Athu ale efunaga omwihidda, ⁵²oliye ahihiyaga guwo ele, othawa madave.

Yesu va Nikuru nuulubale na apogo a aZhudewu

(*Matewuzhi 26.57-68; Luka 22.63-71*)

⁵³Yesu ahithukuleliwaga wa musogoleli a anamakutha, yahitugumana-ga vevale apogo a anamakutha aatene ni apogo a aZhudewu, vamohi ni anamasuuziha malamulo. ⁵⁴Peduru oomuharaga moolapelana ofiya vathaddo va nyuba ya musogoleli a anamakutha. Vevale vahikalaga anamaang'anela yakaraatilege veeko yoothaga. Peduru ahikaraatigi vevo ni anamaang'anela a nyuba ya musogoleli a anamakutha.

⁵⁵Apogo a anamakutha ni Nikuru nuulubale na apogo a aZhudewu yoosayelaga onamoona wi Yesu apiwe, mbwenye kayamfwanyilegena mwaha. ⁵⁶Athu ajinji yoomurathelaga Yesu, naari ndo onamoona weewa kawaakwanaga.

⁵⁷Amohi yahivenyaga owogaga dhoomurathela, yiiraga: ⁵⁸“Hiyo nihi-mwiwa eeraga: ‘Miyo ginobwanyula nyuba ya Mulugu ela yoomagiwa ni madada a athu, va malabo maraaru ginomaga emohi ehinaamagiwe ni madada a athu’ ”. ⁵⁹Naari ndo onamoono weewa kawaakwanaga.

⁶⁰Musogoleli a anamakutha ahivenyaga vameentoni va athu aatene omukoha Yesu, wiira: “We kunaakula yego? Kunafuna wiyaakihe-dha dhinawogiisu dha we?” ⁶¹Yesu kaakulilege yego. Musogoleli a anamakutha ahimukohaga, wiira: “We oli Kirixtu,^x Mwaana a Mulugu Ooreelihiwa?”

⁶²Yesu ahimwaakulaga, wiira: “Miyo gili. Teto munoodha mmoone Mwaana a Muthu agakaraatile omoononi wooja wa Oowodha-wodha akitaga odhulu mmiraboni”.

⁶³Vano musogoleli a anamakutha ahitalaga dhoowara dhaaye, wiira: ⁶⁴“Muhumwiiwa amunyemulaga Mulugu. Ki nnaasayelege onamoono wa ddi?” Aatene yahithongaga wi ofwaneelele apiwe.

⁶⁵Amohiwa yahambeelaga omutapera mare, yoomukuneelaga wiintoni waaye ni guwo, omuddwadhaga, yiiraga: “Ovuhulele! Wuuddwadhile baani?” Anamaang'anela yahimwaakelelaga omuddwadhaga.

Peduru onokoodda wi ohumunona Yesu
(*Matewuzhi 26.69-75; Luka 22.54-62; Zhuwawu 18.15-18; Zhuwawu 18.25-27*)

⁶⁶Peduru agali muddibani vathaddo, ahifiyaga mmohi mwa amwiimeleli a namwali a musogoleli a anamakutha. ⁶⁷Vamooniligiye Peduru oothaga, ahimwaang'anaga pama, wiira:

“We teto waali ni Yesu oNazarethi”.

⁶⁸Mbwenye oliye ahikooddaga, wiira: “Miyo kagimunonile, kaginonile enawogiwe”. Ahivenyagavo odhowela vamavolowelo va cinga. Ogavirele mudhidhi vang'ono mutubi ahunddaga: “Kokoliko”.

⁶⁹Mwiimeleli ole agamoonile wewule, ahiwelelaga owoga ni ale yamwaaddamelege, wiira: “Mulobwana ola di mmohi mwa aliwa”.

⁷⁰Olenddo wa nabiili Peduru teto ahikooddaga wi kaamunonile Yesu.

Vigavirile mudhidhi vang'ono athu yaaligi vevale yahambeelaga omwaaddela Peduru, yiiraga: “Ebaribareene we oli mmohi wa aliwa vovi we teto oli muGalileya!”

⁷¹Vano Peduru oomukooddaga ni olibela, eeraga: “Miyo kagimunonile muthu oyene onamuwogiinyu!”

⁷²Mudhidhi olene mutubi ahunddaga: “Kokoliko” dila ya nabiili, Peduru ahuubuwelelaga dhamwaaddelege Yesu wi: “Mutubi ahinaandde dila

^x 14.61 *Kirixtu* mu ewogelo ya eGerego enatapulela *Muthikitheliwi*, Misiya, naari wi: *oosakuliwa a Mulugu*, oyene onaavulumuse athu.

biili, oneere ogikoodda dila thaaruu wiiraga kuginonile”. Vano Peduru ahivenyagavo, wambeela wuundda.

Yesu omuthogoni wa miladdu wa Pilatu

(*Matewuzhi 27.1-2,11-14; Luka 23.1-5; Zhuwawu 18.28-38*)

15 ¹Ode ogasile bebeheene apogo a anamakutha, apogo a aZhudewu ni anamasuuziha a malamulo, vamohi ni Nikuru nuulubale na apogo aZhudewu aatene yahitugumanaga. Aliwa ommaga Yesu omudhowagana wa Pilatu.

²Pilatu ahimukohaga Yesu, wiira: “We oli mwene a aZhudewu?”

Yesu ahimwaakulaga, wiira: “Onawoga di nyo”.

³Apogo a anamakutha ale yegi omusumela ni dhego dhijinji. ⁴Pilatu ahiwelelaga omukoha, wiira: “Kwinna yowaakula? Mwa dhaatedhene dhedhi dhinoosumeliisuna!”

⁵Mbwenye Yesu kaakulilege yego. Pilatu ahitikinaga.

Yesu onokoniwa ni okwa

(*Matewuzhi 27.15-26; Luka 23.13-25; Zhuwawu 18.38b ofiyedha 19.16*)

⁶Sowi mudhidhi wa Othabela wa Paxkwa,^y Pilatu ahilemeelela omu-
tapula munyakaambura mmohi, oyene nlogo naamulobiiwa. ⁷Ahikalawo
muthu mmohi eethaniwa Baraba. Oyene aali mukaambura mwemule
ni athu amohiwa yafugeleliwe, mwaha wowaapa athu ajinji mudhidhi
wowiinyuwela. ⁸Anamwinji yahitugumanaga va Pilatu wambeela omulo-
ba wi awiirele dhedho dhalemeeleliye.

⁹Pilatu ahaakohaga, wiira: “Munafuna wi guutapuleleni ‘Mwene
a aZhudewu?’” ¹⁰(Pilatu ahiwogaga nda vovi ahinonaga wi apogo a
anamakutha yampelekele Yesu mwaha wa nrima.) ¹¹Mbwenye apogo a
anamakutha yootuzhaga nlogo emulobaga wi atapuliwe Baraba.

¹²Vevale Pilatu ahaakohaga dila biili, wiira: “Ki vano ola munamwii-
riinyu ‘Mwene a aZhudewu’, gimwiirena avi?” ¹³Anamwinji aatene
yookuwaga, yiiraga:

“Mmukomele vamuraddini!”

¹⁴Vevale Pilatu ahaakohaga, wiira: “Yabure ddi yiiriliye-
na?” Anamwinji yoothabwaga okuwa, yiiraga: “Mmukomele
vamuraddini!”

¹⁵Vevale Pilatu voofuna ohagalaliha nlogo ndde, ahaatapule-
laga Baraba, olamula wi Yesu awaxuliwe, vooharela akomeliwe
vamuraddini.

^y **15.6 Paxkwa** thi nlabo norelihiwa noofuneya wa aZhudewu. Yaaka yaatene aliwa yooja dhooya dhoosakuleleya va nlabo nendde wi emuubuwelele Mulugu wi ahaatapula muudhaarini we Egubuddu mudhidhi wa Mozezi.

Anyakoddo enoomunyemula Yesu
(*Matewuzhi 27.27-31; Zhuwawu 19.2-3*)

¹⁶Anyakoddo yahimudhowagana Yesu nyuba yoolibihiwa wewo wakaliisu, yaali nyuba ya kuminadori.^z Nikuru naatenene na anyakoddo yahitugumanaga vevale. ¹⁷Nuwindo, yahimuwarihaga mukanjo wa roxa,^a yahiluwaga kara^b ya miinga omuwariha mmuruni mombedda. ¹⁸Vevale wambeela omulojelaga, yiiraga: “Nnowuulojelani, Mwene a aZhudewu!” ¹⁹Aliwa yoomuddwadhaga muru ni bango, omutaperaga mare, yookokoraga emweebdhaga mombedda. ²⁰Egamalile ombedda, yahimukuguulaga mukanjo waroxa, omuwariha dhoowara dhaaye, vooharela yahimuthukulelaga ode wi yamukomele vamuraddini.

Okomeliwa wa Yesu vamuraddini
(*Matewuzhi 27.32-44; Luka 23.26-43; Zhuwawu 19.17-27*)

²¹Mundila yahigumanaga ni muthu mmohi a nluwa na oSirene aweruwaga omidda eethaniwa Simawu, ola aali baba a Alixandere ni Rufu; anyakoddo yahimuwaddihedhaga othukula muraddi wa Yesu. ²²Aliwa yahimudhowagana Yesu mburo oneethaniwa Gologotha, enatapulela “Mburu wa Egarigadhi”. ²³Vevale yahimvahaga vinyu oomutaganyiha ni mira^c wi amung’we, mbwenye oliye ahimukooddaga. ²⁴Egamukomele vamuraddini, yahigawanaga dhoowara dhaaye. Yahombezalaga gari wi yoone kadda muthu yaathukuliye.

²⁵Mudhidhi wamukomeligiisu Yesu waaligi wora tanu nennayi dha bebeh. ²⁶Vamuraddini, vadhulu va muru wa Yesu, yahikomelagavo ntabwa valebiwege dhoomusumelana, yiiraga: “MWENE A AZHUDEWU”. ²⁷Yahimukomelaga Yesu vamuraddini teto yahaakomelaga ambava abiili, mmohi omoononi wooja, mmohiwa omoononi woong’oto. ²⁸[Mowindo yahaakwanela wona Maleba mwaawogeliwa, yiiraga: “Oliye ohutaganyihedhiwa ni ambava”.] ²⁹Athu yaviraga vevale yoomunyemulaga, ethikaga miru, yiiraga: “Kahuwo weene weeres: ‘Ginoodha gibwanyule nyuba ya Mulugu, gimage mwa malabo maraaru?’” ³⁰Okite vamuraddinivo, wiivulumuse weeka!”

³¹Apogo a anamakutha ni anamasuuziha a Malamulo, yoomunyemulaga ewogaga mmohi ni mukwaaye, yiiraga: “Waavulumusa athu amohi, vano kunaanda wiivulumusa weeka”. ³²Kakita vamuraddini Kirixtu,^d

^z 15.16 Naari wi: *Peretoriyo*. ^a 15.17 *Mukanjo wa roxa* yaali yoowara yoolapa yawara aZhudewu vadhulu va guwo dhimohi, yaali etoonyihedho yooniha othongi wa aRoma, ni aZhudewu. ^b 15.17 *Kara* yaali etoonyihedho yooniha othongi wa aRoma, ni aZhudewu. ^c 15.23 *Mira* waali murombwe wamaaliha dhoovoreya, wataganyihwa ni vinyu. ^d 15.32 *Kirixtu* mu ewogelo ya eGerego enatapulela *Muthikitheliwi, Misiya*, naari wi: *oosakuliwa a Mulugu*, oyene onaavulumuse athu.

mwene a Ezarayeli, nuwoone, nuuroromelege! Ambava yakomeliwigiye-na, yoomuruwanaga ni makalelo mamohive.

Okwa wa Yesu

(*Matewuzhi 27.45-56; Luka 23.44-49; Zhuwawu 19.28-30*)

³³Mudhidhi wa wora ya neekumi nabiili ya mutana yihi yahiku-neelaga elabo yaatene, yahilogelaga wora thaaru ogali wooribawene.

³⁴Mudhidhi wa wora thaaru dha ciguwo, Yesu ahikuwaga moolibiha, eeraga: “*Eloyi, Eloyi, lama sabakathani?*” Enatapulela wi: “Mulugu aaga, Mulugu aaga, mugihiyele ddi?”^e

³⁵Veewiligiisu madhu alena, ale yeemilelege vevale yaahiraga: “Kamwiweni, onamwiithana Eliyazi”.

³⁶Vevale muthu mmohi ahithamagaga othukula nthoje, obwiniha mvinyuni oonyuunya, oseredha obangoni, omvaha Yesu wi amung'we. Nuwindo, muthu ole aahiraga: “Kamwihiyeni! Nimoone akala Eliyazi onaadhe amvenyihevo vamuraddini vale!”

³⁷Vano Yesu ahikuwaga moolibiha, okwa.

³⁸Mudhidhi olene, guwo yagawa nyuba ya Mulugu^f yahitaleyaga dhi-paddi biili, okuma vadhulu, ofiya muddibani. ³⁹Sinturiyawu^g eemelilege osogolo wa Yesu, [ahimwiwaga okuwa,] oliye ahimoonaga mukalelo wakwiligiye, wiira: “Ebaribareene, mulobwana ola aali Mwaana a Mulugu!”

⁴⁰Ahiyana teto yowoonaga woolapelawene, yaaligi Mariya a oMagadala, Salome ni Mariya, maaye a Tiyago mung'onong'ono ni ddibile Zhuuze. ⁴¹Ahiyana ala yoomuharaga okuma oGalileya emukamihedhaga Yesu. Teto ahiyana ajinji yamuharaga okuma oZheruzalemi yaaligi vevale.

Ologhiwa wa Yesu

(*Matewuzhi 27.57-61; Luka 23.50-56; Zhuwawu 19.38-42*)

⁴²Naaligi Nlabo Noosasanyedha, ela sowi sabuddu ahinafiye. Omadhowelo wa nduwa,^h ⁴³wahikala mulobwana mmohi eeriwa Zhuuze a oArimateya, oorumeedheya ni Nikuru nuulubale na mpogo, oofuneya a aZhudewu, oyene teto ajejiha Omwene wa Mulugu. Oliye ahiilibihedhaga odhowa wa Pilatu, omuloba mwiili wa Yesu. ⁴⁴Pilatu ahitikinaga veewiligiye wi Yesu ohukwa. Ahimwiithanaga musogoleli mmohi a anyakoddo zana (100), omukoha akala ebaribareene Yesu ahikwa. ⁴⁵Ageewile pama-

^e 15.34 Masaalimu 22.1 ^f 15.38 *Guwo yagawa nyuba ya Mulugu* yaali guwo yatomeyiwe munyuba ya Mulugu yagawa Mburo Woweela ni Mburo Woweeseesa. Moone Okuma 26.33. ^g 15.39 *Asinturiyawu* yaali asogoleli a anyakoddo zana (100) a aRoma.

^h 15.42 *AZhudewu* yeelenga nlabo wambeela omadhowelo wa nduwa.

dhene dha okwa wa Yesu ni waaddeliwa wa musogoleli a anyakoddo zana (100), Pilatu ahimurumedhaga Zhuuze othukula muruthu wa Yesu. ⁴⁶Zhuuze ahigulaga guwo yoweela ya liinyu, agavenyihilevo muruthu wa Yesu vamuraddini, ahihuruwedhaga ni guwo ele yoweela ya liinyu. Nuwindo, okonaantaha munsiyeniⁱ natopiwe vanibweni, opigiriselavo nibwe nuulubale, ofugana omulago wa nsiye ndde. ⁴⁷Mariya a oMagadala ni Mariya, maaye a Zhuuze, yaaligi vevale yahoonaga valogohiwege muruthu wa Yesu.

Ovenyihwa wa Yesu muukwani

(*Matewuzhi 28.1-10; Luka 24.1-12; Zhuwawu 20.1-10*)

16 ¹Nuwindo, agavirile sabuddu, Mariya a oMagadala, Mariya, amaaye Tiyago, ni Salome yahidhowaga ogula makura oonukwela wi yakuthulele muruthu wa Yesu. ²Ddimingu bebeheene, aliwa yahidhowaga onsiyeni, ³yeeddaga yoowogaga weekiwa yiiraga: “Onaani-pigiriselevo nibwe nifugiwena vamavolowelo va nsiye,^j baani?” Aliwa yawogaga nda mwaha wi nibwena naaligi nuulubale. ⁴Vano yahisugwaga osogolo, woona wi nibwena nihipigirisiwavo. ⁵Aliwa egavolowile munsiyeni mule, yahirurumuwaga ni woova, yahimoonaga muzombwe awarilege dhoweela, agakaraatile omoononi wooja.

⁶Oliye ahawaaddelaga, wiira: “Kamururumuwe. Nyoovo munamusayela Yesu oNazarethi akomeliwe vamuraddini. Kahuwo ebaribari? Mbwenye oliye mu kalimo, ohuvenyihwa! Moone mburo walogohiwiye”. ⁷Vano dhowani mwavahe mpaganyo ola wa anamasuuzaa aaye ni wa Peduru: “Oliye onakala osogolo weenyu onadhowa oGalileya, nyoovo munamfwanya wewo, ebaribareene wona oliye mwawaaddeleligiyeeni”.

⁸Aliwa yahimaruwaga onsiyeni wule egarurumuwile ethawaga egurumelaga vajiinji, mbwenye kiyamwaaddelege muthu dhaapadduwelege nde, mwaha wowoova.

[DHOOLEBIWA DHAWALE DHIMOHKI KINNA MAVERISIKULU 9 OFIYEDHA 20.]

Yesu onomooneyela Mariya a oMagadala

(*Matewuzhi 28.9-10; Zhuwawu 20.11-18*)

⁹[Nuwindo, Yesu agavenyile muukwani, omaselo wa ddimingu, ahimooneyelaga vowambeela Mariya a oMagadala, ole amwiigareliye mineba dhaaye dhootakala mitanu na miinddi. ¹⁰Oliye ahidhowaga wawaaddela dhoopadduwa nde ale yaali akwaaye a Yesu, aliwa yahiku-

ⁱ 15.46 Masiye a mudhidhi olene yakala wona nikungu. ^j 16.3 Masiye a mudhidhi olene yakala wona nikungu.

banya vajinji teto yowuunddaga. ¹¹Aliwa kayarumeedhilege, veewiligiisu wi Yesu mugumi, oliye ahimoonaga.

Yesu onowawooneyela anamasuuz aabiili
(Luka 24.13-35)

¹²Nuwindo, Yesu ahawooneyelaga ni mukalelo mmoheene wa akwaaye aabiili, yeeddaga edhowaga mmiruddani. ¹³Aliwa yahiwelaga wawaadde-la anamasuuz aamohi, mbwenye teto ni aliweene kayarumeedhilege nde, dhaaddeliwigiisu.

Yesu onowawooneyela anamasuuz a kumi ni mmohi
(Matewuzhi 28.16-20; Luka 24.36-49; Zhuwawu
20.19-23; Meerelo a Arumiwi 1.6-8)

¹⁴Omagomelowiwa, Yesu ahawooneyelaga anamasuuz a kumi ni mmohi ejaga vameeza, ahaasumululaga mwaha woohukalana nrromelo, mwaha wowaaruniha ni ohaarumeedha ale yamoonilege Yesu agavenyile muukwani. ¹⁵Oliye ahawaaddelaga, wiira: “Mmwadheyele mwiilaboni mwaatemwene, mwalaleyega Muselu Wapama wa athu aatene. ¹⁶Muthu di muthu onaaromele vano abathiziwa onovulumusiwa, mbwenye ole ohunaaromele onokoneya. ¹⁷Dhi dhinaakale dhitoonyihedho wa ale enaroromela: aliwa eneerege wiigara mineba dhootakala mu ndina naaga teto eneerege owoga dhiwogelo dhimohi; ¹⁸aliwa yahidda nyowa ni madada naari yang'wa ndibwi, kinaapadduwelege yabure; aliwa eneerege waahela madada eewa aredda, vano areddaya eneerege oyila”.

Yesu onogwela odhulu
(Luka 24.50-53; Meerelo a Arumiwi 1.9-11)

¹⁹Vano agawaadde dhego dhaatedhene dhedhi, Yesu ahithukuliwaga odhowiwagana odhulu, okaraati omoononi wooja wa Mulugu. ²⁰Teto anamasuuz yahimaruwaga, wambeela olaleya Muselu Wapama dhipaddi dhaatedhene. Nabwiya owaakamihedha, awoonihaga ebaribari madhu yalaleyiisu ni dhitoonyihedho dhootikiniha.]^k

^k 16.20 Madhu ala a maverisikulu 9 ofiyedha 20 kinafwanyeya mu dhoolebiwa dhawale.